

ጳውሎስ ሮሜ መረሃ ከተሶ ሶህኑት ኣጉስ

ሶቀማንኛ ጳውሎስ ሶህኑት ሮሜ መረሃ ከተበሞሁ ጳውሎስ ሮሜን ሄኣ ዱእ ሞነተ ለኣተ ያጀቤቺሃ ተቃጠብ ኣገርታገ ኣኣታት። ጳውሎስ ያደት ሮሜን ሄኣ ኣመዕናኖን ሜጡብ ቀዉ ጌሰ ኣዕዮች ኤተሮን ኣሰ ሀዕልታንሰ ሰፔን ዩኖቤቹ መርታት እቅ፤ መሲህ ኢሳን ኣመዕነትተኔሃ ደገሃለክ ኣመዕናኑት ሄእንከሰ ሆጎን ለሊሱ ሀሰሰኖስ መሲህ ኢሳን ኣመዕን ትምርት መት-መቲን ከተሶኡ፤ ጳውሎስ ሶህኑት ዊም ደገመኖሁ ከን ሶህኖኒት።

ጳውሎስ ሮሜን ደገንታ ኣመዕናኖተ ወገሬትሰ ህግሾችለክ ዱኣ ኣኣሰተ ተብሳሃ ኣሴሳች ኤተሮን ሶህኖስ ቡዕለ እኮ ጠዉ (1፡17) «መገኒች ደገመኖ ፈየ እሄን ኣመዕነቲን፥ ኣመዕነቲሃ እኮገ እንጂላን ለልዮኡ» ይታ ላገተ ኣሁስ ለሊሰኖ።

ከኒች ኤተሮን ጳውሎስ ከ ሰውት ኣልባሽ ከተበኖ፤ ኣይሁድ መኑሁ ኣይሁድ እህቡ ጉዕመንኩ ጨቢሃ ጠገንቶእረ እኮቤቺሃ መገኒን ሀራዕረመ ሀሰሰኖስ፤ መኑ መገኒን ሀራዕረሞተ ኣታለኖሁ መሲህ ኢሳን ኣመዕናኒት፤ ህከን መገኒን ሜጡብ እክ ሃዕሮ ሜጠመ ላሉት ሃዕሮ ሄኡ እሁስ ጳውሎስ ኣልባሽ ኩሎኡ። ኣመዕናንቹ መገኒን ሜጡብ ወገሬቱ ሄኣኖስ፤ መገን ጠሊለ ኣያኒን ጨብቶለክ ሬሆ ዋልቃች ነጠ ፋሽኖ፤ ፎሎጭ 5 ኬሽ 8 ኢለ ጳውሎስ መገን ሕጉለክ ኣመዕናኖ ሄኡ ኣኣኖ መገን ኣያን ዋልቃ ኣላመሰ መሃጎሬ ለሊሰኖ፤ ህከኒች ኤተሮን ጳውሎስ «መገኑ መረሃ ዮስ ኣለመ ኣዜን ኣይሁዱሁ ኣይሁደ እህቡ መኑሁ ሀት እክ ሜጡ እኮተ ኣታልታኣ?» ዮኖ ጠዕምቶተ መሰለ ኣሰኖ።

ለንኪሃ ጳውሎስ ጠወዕዮገን ኣይሁድ መኑ ኢሰ ቶጉዕነ ፈቁሰ መገንተ ያደ፤ ሁኩንን እኮሁ መሲህ ኢሳ ኣዲን መገኑ ለልሾ ጡም ኣሰቱተ ጉዕመ መን ዘርተ ሀንቀፍ ኣፊሃት። እሁን ቤሉ ኣይሁድ መኑ ኢሰ ቶገ ወክቱ ኣሜተኖገ ጳውሎስ ኣመዕነኖ፤ መጨረሻን ጳውሎስ መሲህ ኢሰ ኣመዕንት ሀት እክ ሄኡ ሀሰሰኖስጎሬ በትሽን ኣመዕናኑት ገገወንከሰ ኢተ ዋቃሃ ኣዎኑ ሀሰሰኖስገ ኩለኖ፤ መገኑ ካደምተኔሃ፥ ኣመዕናኑት ባዲሃሰለክ ገይሀሳ ዮስ ኤገተ፥ መት-መቶ ጠውን ኬኣ ጠዕምቶተ ሂር ኩለኖ።

መጻፋስ ኣፎሃ

መጻፋስ ኣዜን ኣፎ ቡዕለ እኮ ሰውት (1፡1-17)
 ጡሙ መኒሃ ጉዕሚንከ ሀሰሰኖሃ እሁስ (1፡18—3፡20)
 መገን ጡሞ ዋቃሃ (3፡21—4፡25)
 መሲህ ኢሲን ደገመኖ ሃዕሮ ሄኡ (5፡1—8፡39)
 እስራኤል መኑ መገን ያዳን (9፡1—11፡36)
 አመዕናኑት ሀት እክ ሄኡ ሀሰሰኖሳሃ እሁስ (12፡1—15፡13)
 መጨረሻስ ሰውትለክ ወገሬት (15፡14—16፡27)

1 መሲህ ኢስ ካዲንቹ እኮ ሶቀሞ ሆኅተ ገእሞ መገን እንጂሊ ተማርሶተ መጠረሞ ጳውሎሴች ሶሃሞሃ።

2 ሁኩንን እንጂሊ መገኑ ነብያኖን ጠሊሊ መጻፋን ሄጭ ኣሴ ተብሴታ ላገ።

3 ኩ እንጂሊንኩ ደውዴ ዘሬች አለሞ መንቹ እኮ ቤትሰተኔሃ ጠወአኖ።

4 መገኑ ገውንኩስ ጠሊሊ አያን ዋልቃን ቀርቹኔ መሲህ ኢስ ሬሆች ኬሽ ቤቱ እሁስ ዊመ ዋልቃን ደግሲሾ።

5 መሲህ ሱዕምተኔሃ አይሁደ እክበሩ ጉዕሙንኩ አመዕንቶተለክ ኣዘዘንታገ ኣኢሃ እስ መሳን ሶቀሚሃ አበቀኣኔ ኣሰቱተ ቶንኅም።

6 ህከን መኒን ሜጡበ አዕኑሁ መሲህ ኢስረ እኮኖተ ገእንቴንታእራን።

7 መገኑ ኢቴህዕኔለክ ጠሊላኑተ እኮኖተ ገእንቴንተ ርም ከተማን ሄኤንነተሩ ጉዕሙንኩክዕኔ አናኔ መገኒችለክ ቀርቹሃኔ መሲህ ኢሲች ኣሰቱትለክ ወገሬቱሁ ክዕኔኤሃ እሁን።

ገለት ዱአ

8 አመዕነቱክዕኔ ባዶን ጉዕማንን ሞጮጨሞቤቺሃ ጉዕምክዕኔተኔንክ ሄጭ መሲህ ኢስ መሳን ጉዕሚክዕኔተኔሃ ኢ ቀርቹ መገኑኤ ገለትጫም።

9 ጉዕመ ወክት ዱአ አአን ቃጋንክዕኔገ ቤትሰተኔሃ ጠወአኖ እንጂሊ ተማርሲን ዊመ ቀልብንከኤ ካደማሞ መገኑኤ ምስክርሃን።

10 ቲሱ አበ ዱንኬሚች ኤተሮን መጨረሻን መገኑ ዩጎሬ ክዕኔቤቹ አሜቶተ ዋቆኤ ብዝ ዮተ ጉዕመ ወክት ዱአ አአም።

11 አመዕነቲን ጠረኻቴንነተገ አአኖህዕኔ አያን በረከተ ቤሆህዕኔተ ይ ለኣህዕኔተ ሀሳም።

12 ህት ዩሚንኩ እን ክዕኔ አመዕነቲንለክ አዕኑሁ ኢ አመዕነቲን ገገዉንኩኔ ጠረኻጨቀሞታት።

13 አመኤ ኦሶ! አይሁደ እህበ ዋሎ መንቤቸን ልግብ አቶተ ደገሞገን ህትን ክዕኔ በላን አቶተ ደገተ ሀሾሞ እቅ፤ ጠዉ እኮጎሬ ክዕኔቤቹ አሜቶተ ልግብ ወክት ያጅ ከበሬ ኢሊ መኩሆጉሰ ደገኖተ ሀሳሞ።

14 ግርክ መኒሊክ ግርክ እህበ መኒሃ፡ ኤንኬዕናማተለክ ገወ መኒሃ ግዲጁ ዮኤ።

15 ህካን እኮቤቼሃ ክዕኔንከ ሮሞ ከተማን ዮንተ መኒሃ ተሸት ላገተ ተማርሶተ ሄዕላታሞ።

እንጂሊ ላገት መገን ዋልቀተ እሁሰ

16 እን እንጂሊ ላገን ሙላምበክ፤ ተሸት ላገት አይሁዲሃለክ ግርክ መኒሃ አመዕንታ መኒሃ ጉዕሚንከ መገን ወልቀት ፈይሲሃት።

17 ፈዩ መንቹ አመዕነቲን ሄኤ ደአኖ የመሞ ከተበሞገን መገኑ መን ፈዩ እሁሰ ወለአኖሁ ዋዕኔቹ ኤተሩ ኢሊ ጠለዕል አመዕነቲን እሁሰ ህከን ተሸት ላገን ለሌእ።

መን ሂልመተኔሃ

18 መኑ ሂልማንተሰ ሀንቁ ለለኖበእገ አታክ፤ መገኑ ዋጅትበቤቼሃለክ ፈይመት ዮሰበእቤቼሃ እሰ አሌን መገን ኤሙዕርት ሰሜቶ አሜታኦ።

19 መሰንተሰ መገንተኔሃ ደገሙ ሀሰሰኖሃ ጉዕመንከ መገኑ ለልሾሰቤቼሃ አሳሃ ኑር እክ ለልዮእሃን።

20 አዲንያ አሉ ከለቀሞ በሬቶ ኬሽ መኒሃ ለለኖበእ መገን ሃሉ ሁኩንን ዘላላሚሃ ሄኦ ወልቀሰለክ ቀርቼ እሁሰ እሰ ከለቆ ጠው መሳን ዊመ እክ ለሌቤቼሃ መኑ ቤሳ ቤሲሃ መሰት ዮሰበኦ።

21 ህትን እሰ መገኑ ደገን መገኑ እህሃሰ ሀሰሰኖ ኬዕምኣለክ እሱ ገለትጩ ግቦኤ፤ ሰውቱንኩሰ ተሰ እኮ፤ አጥረመትቡ ቀልቡሰ ቱንሰቹ እኮ።

22 «ነኤ ሀይቻኑተ» ይተንን ገዋኑተ እኮኤ።

23 ሄኦ መገኑ ከበጅታ ወጥ ሄእበ መን ሞሰሊሃ፡ ጭኑተ፡ ሾል ሎከት ዮሰ ግዚሃለክ ኡለ አሌን ጎሾሽንትኦ ግዝ ደኒን መክሴመ ሞሰሊሃ ኬዕምኣ አቶኤ።

24 ህካን እኮቤቼሃ ገገዉንኩሰ ገይሰ ጅሰም አሌን ሙልሰኖርቹ አቶተ መገኑ ንጃሱ ዊሞ ሂሊ ሄዕላታተሰ ጠገንቶረ አካገ ህግሽ አሴሰ።

25 ሁኩን እኩሁ መገን ሀንቅ ክዘቢን ደርቶቤቺሃቲ፥ ካለቅ ወጥ ከለቀሞሀሂሃ ሰገደቤቺሃለክ ካደንቶቤቺሃት፤ እኮጎሬ መገኑ ዘማሂሃ ጉዕሚንከ ገለትጨሞሃ እሁን፤ አሚዕን።

26 መኑ ህካን አቶ መሳን መገኑ ገበእበ ሙልሰኖ ሄዕላቻተሰ ህግሽ ኣሴሰ፤ ሜንቱሰ ሆሮ ጎንን ኦሰኡ አጉርት ርሰሞበእ ሃሌን ደርቶኡ።

27 ህትን ጎኑ ርሰሞ ሃሌን ሜንቲን ኦሰኡ አጉርት ጎኑ ጎኒን ሜጡበ ሙልሰኖ ጠወ አቶኡ፤ ሉጨንሸሰ መሳን ሀሰሰኖሰ ቅጣት ገይንከሰ ቶጋኦ።

28 መኑ መገኑ ደጎተ ሀሱሆጎቤቺሃ አኡ ገበእበ ጠወ አቶተ መገኑ ሂላ ሰውቲሃ ህግሽ ኣሴሰ።

29 ህካን እኮቤቺሃ ብድሊን፥ ሂልማን፥ እዲድማን፥ ተንኮን፥ ሞቀኝማን፥ ነብሳሃ ሾን፥ ብታን፥ ጣንሶን፥ ሂላ ሄዕላቻን ጉዕሚን ዊንቶእሩለክ ህትን ሄዕሞታእሩን።

30 መን ሱዕመ ቤሳእሩ፥ መገኑ ግባእሩ፥ መን ሆፍሳእሩ፥ ቦንታእሩ፥ ገዋንከሰ ድከኣእሩ፥ ሂለርቹ ሀሳእሩ፥ አኒሃለክ አመታ አዘዘንትበሩ።

31 ሰውይታበእሩ፥ ዉለ ድጅታሩ፥ ኢተት ዮሰበእሩ፥ ጎደበ ጠረኛኖታን።

32 «ህትኔ ጠወ አታ መኑ ጉዕሙንኩ ሬሁ ሀሰሰኖሰ» የኖ መገን ሕገ ደገን ህካን ጉዕሙንከ አታኦ፤ ጠለዕል ህካን አኡ እሁዕን ህት አታ መን ኬሰንሰታኦ።

2

መገን ፍርድተኔሃ

1 እት ዋሎ መን አሌን ፈረዳንት መንቸ! አዪሁ እኮንትጎሬ ደባቡርታንትርቹ ዮሄበእ፤ መሰንትሰ እት ዋሎ መን አሌን ፈረዳንት ሁኩ ፍርዱ መኑ አእኖሃ አታንትቤቺሃ ዋሎ መን አሌን ፈረዳንት ወክት ገይክ አሌን ፈረዳንቲት።

2 ህትኔ ጠወ አእኖ መን አሌን መገኑ ፈረደኖ ፍርዱ ሀንቅ እሁሰ ደንጋም።

3 እት ህትኔ ጠወ አእኖ መናን ፈረደን እስ አታርቹ አታንቲሃ እኮንትጎሬ መገን ፍርዲቸ ፈቃንቲሃ አጉደኖሄትንዶ?

4 ህከረንገ መገን ጎደብ ላፍመታ፥ እጆቁሰለከ አታዕልሰ በትኝ ህንቃንቲትንደ? መገኑ አጉሩሰ በትሾሄሁ ኬሳሃ ጨብክ ቶቦታንትገ አኣሄተ እሁሰ ደጋንትበእንደ?

5 ጠዉ እኮጎሬ ጎደበ ጠረኝማተክለከ ጨብክ ቶቦቱ ግቦ ቀልቢሃክ መገን ኡሙርትለከ ሀንቅ ፍርዱ አሜተኖ በርገይክ አሌን ኡሙዕርተ ጭምአታንቲት።

6 መሰንትሰ መገኑ መት-መቲሃሰ ሆጎሰገ ኣሰኖሰ።

7 ህትን አታዕሊን ጡመ ሆጉተ አኢን ገለትለከ ኬዕምኝ በእበ ሄኡ ሀሳሁኡት መገኑ ዘላለም ሄኡ ኣሰኖሰ።

8 ገይሰ ጥቅም ኢትታሩ፥ ሀንቂሃ አዘዘሙ ግብ ክዝብሃ አዘዘንታ መኒሃ መገን ኡሙዕርትለከ በለት አሌሰ አካአ።

9 ወዕሩ አይሁዳን ህከኒኝ ኤተሮን ግርካን ሂለርቹ አኣኖ መን አሌን ጉዕማንን ኦርሽትለከ ጨነቀሙ አሜተኖሰ።

10 ጠዉ እኮጎሬ አይሁዲሃ እኮ ግሪክ መኒሃ ጡመ ጠወ አኣኖ መኒሃ ጉዕማንከ ገለቱ፥ ኬዕምኝለከ ወገሬቱ ኣሰመኖሰ።

11 መሰንትሰ መገኑ መን ሚንተ ለዕይ ፈረደኖበአ።

12 ሕጉ ዮበኢሃ ጨብ አዕዮ መኑ ጉዕሙንኩ ሕጉ ሄዕበሰጎሬ በኣአ፤ ህትን ሕጉ ሄአንሰ ጨብ አታ መን አሌን ጉዕማንን ሕጊን ፈረደመኖሰ።

13 መሰንትሰ መገን ብሬን ፈያኑት እካእሩ ሕገ አገርታእረ ቤሉ ሕገ ሞጮጭት ሆጎ አሌ ሆሲሰበሩ ፈያኑት የመንት ዋለክንታበአ።

14 ሙሰ ሕጉ ዮሰበእ አይሁደ እኮበእ ኡመቱ ክልቀቲችሰ ሕጊሃሰ አዘዘንታአ፤ ሁኩንን ለሊሰኖሁ መቱርቹሁ እሰ ሙሰ ሕጉ ዮሰበእጎሬሁ ሕጉ የኖሃ አኡ ሀሰሰኖሳሃ እሁሰ ደጉሰ ለሊሰኖ።

15 ሁኩንን ሕጉ የኖሁ ጉዕሙንኩ ቀልቤንከሰ ከተበሞሃ እሁሰ ለሊሰኖ፤ ህትን ቀልቡሰ አሌሰ መሰከረኖ፤ መሰንትሰ ቀልቤሰ ከተበሞሁ መት-መቶረ ዋቀሰኖሰ፤ መት-መቶረንገ እሰንተ ሀዕለኖሰ።

16 ሁኩንን እሀኖሁ አን ዱዱብሳም እንጂል ላገ ሃሊን መገኑ መሲህ ኢሰ አዲን መኑ አዕዮ ማጠሞ ጠው አሌን ፈረደኖ በርዪት።

አይሁደለከ ሕገሰ

17 ጠዉ እኮጎሬ አት ገዉክ «አን አይሁድቹሃን» ይቶንት ጎሬ፥ ሕጋን ድከኦንትጎሬ፥ መገኒሃ እሆንከክ ቦንቶንትጎሬ፥

18 መገኑ ኢተኖርቹ ደጎንትጎሬ፥ ሕጊኝ ተማርቶንትቤቹሃ ጡመ ጠወ አጥራመት ደጎንትጎሬ፥

19 እት «ቆቃኖተ አዎንሳንቼሃ ይቶንት ጎሬ፤ ቱንሰቸን የሀኑኤንተ ኑርሃን ይቶንት ጎሬ፤

20 ገዋኑተ ተማርሳምሃን ይቶንት ጎሬ፤ ኦሱተ ተማርሳም ይቶንት ጎሬ» ህትን «ሕግ ሀንቂን ዊሙ ደጉ ዮኤ» ይታንት።

21 እት ዎሉ መነ ተማርሳታንቲሁ ገዉክ ተማርሳታንትበእንደ? ህትን «ሞግቶኖቼ» ይተን እት ገዉንኩክ ሞግተንንደ?

22 ዝነተ አቶኖቼ ይተን እት ገዉንኩክ ዝነተ አተንንደ? እት ሸርኬተ ሰገዱ እትታንትበእ፤ ጠዉ እኮጎሬ ክዝብ መገናካተ ሰገዴኖስ ምነተ ዘረፈንንደ?

23 እት መገን ሕጋን ድከኣንት፤ ጠዉ እኮጎሬ መገን ሕገ ድጅተን መገኑ ቦርርሲሳንት።

24 ሁኩንን «ክዕኔ መሳን መገን ሱዕሙ አይሁደ እህበ መን በላን ቦርረመኖ» የመም ከተበዋጋት።

25 ሕገ ዊንሸታንቲሃ እኮንትጎሬ ጡርከሙ ደግለለኖሄ፤ ጠዉ እኮጎሬ ሕገ ድጅታንቲሃ እኮንትጎሬ ኪ ጡርከመሙ ጡርከመንትበሀንገ ዎለአመኖ።

26 ህካን እኮቤቹሃ ጡርከመምቡ አይሁደ እኮበእ ሕግ ትዛዝ አአኖሃ እኮጎሬ ጡርከመሙ ሆጉሰ ጡርከመዋግ ዎለአመኖበእንደ?

27 ኬሳሃ ከተበዋ ሕጉ ሄእንኬለክ ጡርከመንቶንቲሃ እክ ሕገ ድጅታንትረ ማለን ጡርከመምበእህንገ እክ ሕገ ዊንሸኖ አይሁደ እኮበእ መንቹ ኪ አሌን ፈረደኖ።

28 ሱዕሚን አይሁደ እኮሁ ሀንቅሃ አይሁድቹሃበእ፤ ህትን አብልን ለለኖ ማል ጡርከሙ ሀንቅሃ ጡርከሙበእ።

29 ሀንቅ አይሁድቹ ኣዚን አይሁድቹ እኮሃን፤ ሀንቅ ጡርከሙንኩ መገን አያኒን እህኖ ቀልቢሃ ጡርከመሙሃ ቤሉ ሕገን ከተበዋ ሃለን ማልሃ ጡርከመሙበእ፤ ህትናሙ መንቹ ገለት ቶገኖሁ መገኒቶት ቤሉ መኒቶበእ።

3

አይሁድ መኑ አመዕኑ ሆጉሰ

1 ቱሱ አይሁድቹ እሁ ቆሀኖሁ ሚሃት? ህከረንገ ጡርከሙ መ ደግለለኖ?

2 አይሁድቹ እሁ አቡ ጥቅሙ ዮሰ፤ ወዕናንከ መገኑ ላገሰ ኤገተ ኣሴኢሁ አይሁዲሃት።

3 ህከረ እሳች መት-መቼ አመዕነሙ ሆጋረ አመዕነሙ ሆጉሰ መገኑ አመዕነሞ እሁሰ ፌሰኖንዶ?

4 ሆሮ ፌሰኖበአ!

«ጠወኢነት ላጋች ኬዕዮሀኒን ሀንቅ መንቹ እካንት፤

ህትን ባለጋራክ ኦዳንት ወክት ገርታንት»

የመም ከተበሞሀንገን መኑ ጉዕሙንኩ ክዝበኝ እኮጎሬ መገኑ ሀንቅኝሃን።

5 ጠው እኮጎሬ ኒ ሀንቀኛ እሁ ሆጉ መገን ፈይመተ እሁሰ ለሊሰኖሃ እኮች መ ይናም? መገኑ ጨብኔተኔሃ ቀጠዕኔጎር ፈረደኖሁ ሀንቅያበአ ይናምንዶ? ከንቤችን ጠወዕናሚሁ መን ሰውትጋት።

6 ህካን መገኑ ኤቡንከ፤ ህት እኮች መገኑ ኦዳንያ አሌን ዮ መን አሌን ፈረደተ ህት እክ አታለኖ?

7 ጠው እኮጎሬ ኢን ክዝበኝ እሁ መገን ሀንቀኛመተ ለሊሰኖሃለከ ኬዕምኝሰ በርገኖሃ እኮች ቴሱ ኢለ ጨበኛ መንችገ አሌኤ ፈረደመኖኤንንዶ?

8 መት-መቼ መኑ «ጡመርቹ ደዕኖተ ሂለርቹ አዕኖ» ይን ጠወዕኖምሀንገ አት ሄሜን ቦሮርታኔት፤ እሰ አሌን ፈረደኖ ፍርዱ ሀንቅያ ፍርደ።

መኑ ጉዕሙንኩ ጨበኛ እሁሰ

9 ቴሱ መ ጠወዕናም፤ ነኡ አይሁደ እኮበእ መኒች በትንሰ ደግለሸቀማምረንዶ? ሆሮ ህትጎተበአ! ወዕናንከ መኑ ጉዕሙንኩ አይሁደ እኮ አይሁደ እኮበእሩ ጨብሃ ጠገንቶረ እሁሰ ሄጭ ኩሎም።

10 መሰንትሰ

«መቱ መንቹሁ ፈደ ዮበአ፤ መቱሁ ሆሮ ዮበአ፤

11 አጥራመተኖሁ መቱሁ ዮበአ፤

ህትን መቱ መንቹሁ መገኑ ሀሰኖሁ ዮበአ።

12 ጉዕሙንኩሰ ዎቃኤ ገፈርቶኡ፤

ህትን ደግለልታበእረ እኮኡ።

ጡመ ሆጉተ አአኖሁ ዮበአ፤ መቱሁ ሆሮ ዮበአ።

13 መን ምዕርታ ሂለ ላገተ ጠወኢሃ

አፎሰ ፈንተዕዮ ሎድጋት፤

እረቤንከሰ ጣንሰታኢ፤

የቡሮንከሰ ዎሪች መርዙ ዮሰራ።

- 14 አፎንከሰ ቦርሩለክ ቁንቁቱ ዊሞሰ።
 15 ሎከሰ መን ቁጉ ዱኒሃ ደዕልታኦ።
 16 ዋቃንከሰ ቤሱለክ ኦርሸት ዮኡ።
 17 ወገሬት ዋቃሃ ደጋበኦ።
 18 መገኑ ሆሮ ዋጅታበኦ» ህት የመሞ ከተበሞኡ።
 19 መኑ ጉዕሙንኩ አፎሰ አፎተ ኣዱንያ አሌን ዮ መኑ ጉዕሙንኩ መገን ፍርድ ኣዜን እኮተ ሕጉ የኖሁ ጉዕሙንከ ሕግ ኣዜን ዮ መኒሃ እሁሰ ደንጋሞ።
 20 ህካን እኮቤቺሃ መኑ ጉዕሙንኩ መገን ብሬን ሕገ አገሪን ፈየ አሆተ ኣታለኖበኦ፤ ሕጉ ጨቡ መሃጎሬ ለሊሰኖ።

ፈይመት አመዕነቲን እሁሰ

- 21 ቴሱ እኮጎሬ መገኑ መነ ፈየ አኦኖ ዋቆሁ ሕጊቹ አደደ ዋቁን እሁሰ ለልዮኡ፤ ሁኩንን መሰሰ ሕጊንለክ ነብያኖን መሰከረሞኡ።
 22 ሁኩንን አደደመት ዮበኢሃ አመዕነታሁኡተ እኮ መሲህ ኢሰን አመዕኒን ደገመኖ መገንተ ፈይመ።
 23 መኑ ጉዕሙንኩ ጨብ አቶኡ፤ መገኑ ኣሴሰ ኬዕምኙ ጤዕይዮሰ።
 24 ህካን እኮቤቺሃ መኑ መሲህ ኢሰ ወዝኖ አዲን መገን ኣሰቶን ህትን ፈየ እኮኡ።
 25 መገኑ መሲህ ኢሰ ክትመ አዕይ ኣሴኢሁ እሶን አመዕነታሩ ጉዕሙንኩ ቁጊንከሰ ጨቢቹ መረርሲጬ አመዕነቲን ደእቶታት፤ መገኑ ካን አኡሰ ኣታዕሊንከሰ ወዕና ሄዕዮሰ ጨብ አጉሪን ገይሰ ሀንቅ ፍርደ ለሊሶታት።
 26 ህትን መገኑ ህካን አዕዮሁ ገዉሰ ፈየ እሁሰ ለሊሰኖሁ ኢሰን አመዕነታሁኡተ ፈየ አኦኖሃ እሁሰ ከን ዘማኔን ለሊሶታት።
 27 ቴሱ ገዋንተኔ ድከዕናምርቹ ዮበኦ፤ መቶርቹን ድከዕናምበኦ! ድከዕናምበኦ መሰት መርቹሃን? ሕገ አገሪንትንዶ? ህትጎተበኦ፤ ጠዉ እኮጎሬ አመዕነቲኒት።
 28 ህካን እኮቤቺሃ መገኑ መነ ፈየ አኦኖሁ መኑ ሕግ ሆጉተ አኢን እሁዕነ አመዕነቲን እሁሰ ደንጋሞ።
 29 ህከረንገ መገኑ አይሁድያ ጠለዕል መገኑንዶ? አይሁድ እኮበኦ መኒሃ መገኑቀበኦንዶ? ሀንቅንከ አይሁድ እኮበኦ መኒሃ መገኑ።

30 መገኙ ማጥቹሃን? ጡርከመንቶ አይሁድ እኮ ጡርከመንቶበእ አይሁድ እኮበኢሃ ፈየ አኦኖሁ እሶት።

31 ህከረ አመዕነት መሳን ሕገ ሻርናምንዶ? ህትጎተበእ! ሕገ ጠረኝነሳም ቤሉ ሻርናምበእ።

4

እብራሂም አመዕነቲን ፈየ እሁስ

1 ማልን አበኑኔ እብራሂም «ደኤእ» ይናምርቹ መርቹሃን?

2 እብራሂም አዕዮ ሆጎን ፈየ እኮ እቃን ድከአኖርቹ ሄአኖስ እቅ፤ እሁን ቤሉ መገንህኔን ድከአኖርቹ ዮሰበእ።

3 መሰንትስ ጠሊሊ መጻፋን መ የኖ? መጻፋን «እብራሂም መገኖን አመዕኔእ፤ አመዕነቱንኩስ ፈየ እክ ዋለአሞስ» የመሞ ከተበሞኡ።

4 ሆጉተ አኦኖ መንቹሃ ደሞዙስ አዕዮ ሆጎስገ ዋለአመኖስ ቤሉ አሰቶገ ዋለአመኖስበእ።

5 መኑ ሆጉት ሄዕበሰጎሬ ጨበኛ ፈየ አኦኖ መገኖን አመዕኔ ጎሬ አመዕነቱስ ፈየ እክ ዋለአመኖስ።

6 ህትን መቱርቹሃ አኡዕነ ፈየ እኮህንገ መገኑ ዋለአኖስ መንቹ ማሰአሞሃ እሁስ ደዉድ ጠወእን

7 «ብድሉስ አጉረሞሰለከ
ጨቡስ ፈቁን የመሞስ መኑ
ማሰአንቶእረ!

8 ህትን ቀርቹ ጨብስ ዋለአኖበእ መንቹ
ማሰአሞእሃን!» ይዮኡ።

9 ህከረ ኩ ማሰት ጡርከመሞ መኒሃትንዶ ጡርከመሞበ መኒሃት? ነኡን «እብራሂም አመዕነቱ ፈየ እክ ዋለአሞስ» የመሞኡ።

10 እብራሂም አመዕነቱ ፈየ እክ ዋለአሞሲሁ ህትጎታን? ጡርከመሞች ኤተሮንትንዶ ጡርከመሙዕናንት? ጡርከመሙዕናን ብርታት ቤሉ ጡርከመሞች ኤተሮኒበእ።

11 እብራሂም ጡርከመሙዕናን ብርተ ዮስ አመዕነቲን ደኤ ፈይመ መላተ እሆተ ጡርከመሞ፤ ህካን እኮሁ እስ ፈያኑተ እክ ዋለአንቶት ጡርከመንቱዕናን አመዕነታ መኒ ጉዕሚንከ እነ እሆታት።

12 ህትን እብራሂም ጡርከመሞ መኒሃ አነሃን፤ ጠዉ እኮጎሬ ጡርከመሞ ጉዕሚሃስ እሁዕነ አኑኔ እብራሂም ጡርከመሙዕናን ብርንተ ዮስ አመዕነት ሞሳልተ አዎንታ መኒሃ እነ እሆታት።

አመዕነትተኔሃ ኣሰሞ ተብሳሃ

13 እብራሂሚሃለከ ዘሬተሰ ኣዱንያ አል ረገአኖ ተብሶ አሜሻሰ ሕገ አገሬን እሁዕናን አመዕነቲን ደገንታ ፈይማኒት።

14 ተብሳሰ ረገአሩ ሕገ አገርታ መነ እኮጎሬ አመዕነቱ ከልበ እሀኖ፤ ህትን ተብሶንኩ ዋጉ ዮበኢሃ እሀኖ።

15 መሰንትሰ ሕጉ መገን ኡሙርተ ኤበኖ፤ ጠው እኮጎሬ ሕጉ ዮበኢቤሻን ሕገ ድጂ ሄአኖበአ።

16 ተብሶሰ ጀመርሁ አመዕነት አሌንት፤ ሁኩ ተብሶሁ እብራሂም ዘሬተ ጉዕሚንከ ህከ ተብሳሃ ረገአኢሁ መገን ኣሰቶን ኣሰሞሃ እሁሰ ተሬገጠሞኡ፤ ሁኩንን ሕገ አዎንታ መኒሃ ጠለዕል እሁዕነ እብራሂምገ አመዕነቶሁኡተ ጉዕሚንካት፤ ከን ሃሊን እብራሂም ጉዕሚንከኔ አነሃን።

17 እብራሂምተኔ «ልግብያ ኡመቲሃ እነ አዕዮንኬ» የመሞ ከተበሞኡ፤ እሰ ሬቶአረ ሬሆች ኬስኖሀኒንለከ ዮበኢሃ ሄአኖገ አዕይ ገአኖ አመዕኔ መገን ብሬን ጉዕሚንከኔ አነሃን።

18 እብራሂም ዘርክ አበ ፈከንታአ የመሞ ከተበሞገን ልግብያ ኡመቲሃ እነ እሀኖገ አመዕኔኢሁለከ ተብሳሃ አዕዮሁ መቱርቹሃ ተብሳሃ አኤንበ ጠቀኒት።

19 እሰ ጥቤ ዘማን እኮሰቤቹሃ ጅሰሙሰ ሆግ እሎተ አታለኖበእገለከ ሳረ እልትባተለከ ባልቆኢተ እኮጎሬ አመዕነቲን ሆሳበአ።

20 አመዕነቲንከሰ ጠረኘ እክ መገኒሃ ኬዕምኝ ኣሴ ቤሉ መገኑ ኣሴ ተብሴን አመዕኑ ሆጊን ሆሮ ሸክዮበአ።

21 መገኑ ኣሴሰ ተብሳሃ አኡ አታለኖገ ዊመ ቀልቢንከሰ አመዕነኖ እቅ።

22 ከኒች ኬዕዮሀኒንት እብራሂም አመዕነቱሰ ፈየ እክ ዋለአሞሲሁ።

23 ጠዉ እኮጎሬ «ፈየ እክ ዋለአሞሰ» ይታ ላገት ከተበሞሁ ጠለዕል እብራሂሚሃበአ።

24 ጠለዕል እብራሂሚሃ እሁዕነ ኔሳሃ በርገይት፤ ቀርቹኔ ኢሰ ሬሆች ኬሾሰ መገኖን አመዕነኖም ኔሳሁ አመዕነቱኔ ፈየ እክ ዋለአመኖኔ።

25 ኩ ቀርቼኔ ኢሰን ጨብኔተኔሃ ሬሆተ ህግሴን ኣሴመሲሁለከ ኔሳሁ መገን ብሬን ፈየ አኦኔተ ሬሆች ኬዕዮሃን።

5

አመዕነቲን ደገመኖ ወገሬትለከ ሙንዲኖተኔሃ

1 ቴሱ ነኡ ፈይመተ ደእኖሚሁ አመዕነቲን አኮቤቺሃ ቀርቾንከኔ መሲህ ኢሰ አዲን መገኒን ወገሬቱ ዮኔ።

2 መሲህ ኢሰ አዲን ቴሱ ኡርኖም መገን ኣሰቶበ አመዕነቲን ኣንጎም፤ ህትን ተብሴን መገን ኬዕምኣ ቤቀማምረ እንኮምቤቺሃ ሙንደዕናም።

3 ህከንን ጠለዕል እሁዕነ ኦርሸት አታዕሊን ጠረኚን ኡሩ ደግሲሰኖሃ እሁሰ ደንጋምቤቺሃ ኦሪሻንከኔ ሙንደዕናም፤

4 አታዕሉ ጠረኝመተ ኤበኖህንገን ህትን ጠረኝመት ተብሳሃ ኤባገ ደንጋም።

5 መገኑ ኣሴኔ ጠሊለ አያን አዲን መገን ኢተት ቀልቤንተኔ አበ ዊንቶቤቺሃ ተብሶሰ ሙልሰኔበአ።

6 ነኡ ላፋኑተ እንኮምገን መገኑ ዬ ወክቱ ኢሌ ወክት መሲህ ኢሰ ጨበኛኖተኔሃ ሬዮኡ።

7 ፈየ መንች ወጥ ሬሆኖ መንቹ ደጉ አበ ኦሪሰኖ፤ እኮጎሬ ጡመ መንች ወጥ ሬሆኖ መንቹ ደጊሃ አታሌኖሃ እሆኖ።

8 ጠዉ እኮጎሬ ነኡ ጨበኛኑተ እንኮምገን መሲህ ኢሰ ኒ ወጥ ሬዮኡ፤ ሁኩንን መገኑ ሃንከ ኢተኖኔጎሬ ለሊሰኖ።

9 ቴሱ ነኡ ፈየ እንኮሚሁ መሲህ ኢሰ ቄጊን እኮች በትንሰን መገን ኡሙዕሬች ጡምኖሚሁ ኢሲኒት።

10 መሰንትሰ ነኡ መገን ባለጋረተ እንኮምገን ቤትሰ ሬሆን መገኒን ሀራዕረሞም፤ ሀራዕረሞሚች ኤተሮን እሲችን አበ ኢሰ ሄኡን ጡምኖም።

11 ህካን እሁዕነ ቴሁ መገኒን ሜጡብ ሀራሩተ ደእኖሚሁ ቀርቼንከኔ መሲህ ኢሰ አዲን መገኒን ሙንደዕናም።

አደመለከ መሲህ ኢሰተኔ

12 መቶ መንች መሳን ጨቡ ከ ኣዲንያ አል አሜቾ፤ ጨብ መሳንን ሬሁት አሜቶኡ፤ ህትን መኑ ጉዕሙንኩ ጨብ አዕዮቤቺሃ ሬሁት ጉዕመ መን አሌን አሜቶኡ።

13 መሰንትሰ ሙሰ ሕጉ ኣሰመኖሀኒች ሄጭ ጨቡ ኡለ አሌን ሄዕዮ እቅ፤ ጠው እኮጎሬ ሕጉ ዮበእ ወክት ጨቡ ገዉንኩሰ ጨብገ ዋለአመኖበአ።

14 እሁን ቤሉ አደምገ ሕገ ድጅት ጨብ አቶበእ መን አሌን ሆሮ ፈቁዕን ሬሁት አደሚች ኬሽ ሙሰ ኢላ መን አሌን ጉዕማን ሹምነቱ ደእቶኡ።

15 ጠዉ እኮጎሬ መገን አሰቶ ሽልማቱ መን ጨብጋበእ፤ መቶ መንች ጨብ መሳን ልግቡሰ ሬቶገን መገን አሰቶንለከ መቶ መንች መሲህ ኢሰ መሳን ደገሞ አሰቶ ሽልማቱ ልግቤ መኒሃ ትርፈ ትርፊን አሰሞ።

16 ህትን መገኑ ጠለዕለ አሴኔ ሽልማቱ ኤቦ አሰቱት መቶ መንች ጨቡ ኤቦ ላልችጋበእ፤ መቶ መንች ጨብ መሳን አሰሞ ፍርዱ ቅጣት ኤቦ፤ ልግብያ ጨብ መሳን አሰሞ መገን ሽልማቱ ፈይመተ ኤቦ።

17 መቶ መንች ጨብተኔሃ ሬሁት ህከ መቶ መንች አዲን አሰንቶች ህከኒች አበ መገን አሰቱታ፡ ጠሊልመሰ አሰቱታ ኣእታ መኑ መቶ መሲህ ኢሰ አዲን ሄኣኣ፤ ሄኣኣ፤ መቶ መንች ጨብ መሳን ሬሁት መን አሌን ጉዕማን ሹምነቱ ደእቶኡች መገን ትርፈ ትርፊን እኮ አሰቱትለከ ፈይመ ሽልማት ቶጎሩ መቶ መንች መሲህ ኢሰ መሳን በተዕዮ ሄኡ ደእት ነገሳኣ።

18 ቱሱ መቶ መንች አደም ጨቡ ቅጣት ፍርዱ መን አሌን ጉዕማን ኤቦገ ህትን መትሰ መሲህ ኢሰ ፈይመ ሆጉት ልግብ መን ቅጣቲች ነጠ አዕይ ሄኡ አሰኖሰ።

19 መሰንትሰ መቶ መንች አዘዘሙ ሆግ መሳን ልግቡ መኑ ጨበኛኑት እኮገን ህትን መቶ መንች አዘዘሞ መሳን ልግቡሰ ፈየ እኮኡ።

20 ጨቡ በተኑት ሕጉ አሚኛ፤ ጠዉ እኮጎሬ ጨቡ በተዕዮ ቁድሬን መገን አሰቱት አበ በተኑኡ።

21 ኩን እኮሁ ጨቡ ሬሁተ ኤቢን ነገሾገን መገን አሰቱት ፈይመተ ኤቢን ህትን ቀርኞ መሲህ ኢሰ አዲን ዘላለም ሄኡ ኤቢን ነገሶታት።

6

ጨቢች አደ እሄን መሲህ ኢሲን ሄኡ

1 ቱሱ መ ይናም? መገን አሰቱት በተኑት ጨብ አዕነን ሄዕኑንደ?

2 ሆሮ ህትጎተበእ፤ ነኡ ጨብ አኢች ሬኖሞሩ ሀት እንክ ጨብ አዕነን ሄዕናም?

3 መሲህ ኢሲን ሜጡብ እንኮተ ጠመቀሞምሩ ጉዕሙንኩኔ ሬሁሰ ቤቀማምረ እሁኔ ጠመቀሞንከኔ ደጌነንተበእንደ?

4 ነኡሁ እሲን ሜጡብ ጠመቀማም ወክት ሬሆንከሰ ሜጡብ እንኮተ እሲን ሜጡብ ሞገሞም፤ መገን አላመት መሲህ ኢሲን

መገን ከዕምኝ ዋልቃን ሪሆች ኬሾገን ነኡሁ ህትን ሃዕር ሄኡ ሄዕኖተ ኬዕናም።

⁵ ሪሆንከሰ እሲን ሜጡብ እንኮሚች ህትን ኬኡንከሲ እሲን ሜጡብ እንካም።

⁶ ከ ኤተሩ ጨብሃ ርሰተ እንካምበእገለከ ጨበኛሙ ጅሰሙኔ ኒች ሸቆተ ኑባጴ ጅሰሙኔ ኢሰን ሜጡብ ሰቀለሞገ ደንጋም።

⁷ መሰንትሰ ሪዮ መንቹ ጨቢሃ ጠገሚች ነጠሃን።

⁸ ጠዉ እኮጎሬ መሲህ ኢሰን ሜጡብ ሪኖምጎሬ እሲን ሜጡብ ሩሂን ሄዕናምገ አመዕንናም።

⁹ መሰንትሰ መሲህ ሪሆች ኬዕዮቤቹሃ ለንኪሃ ሆሮ ሪሆበእገለከ ሪሁት ከ ኤተሩ እሰ እሌን ሹምነቹ ዮሰበእገ ደንጋም።

¹⁰ እሰ ሪሀን ጨብ ዋልቀተ ቢጦተ ሚጦረን ሹል ሪዮኡ፤ ጠዉ እኮጎሬ ሩሂን ሄኡን መገን ኬዕምኚሃ ሄአኖ።

¹¹ ህትን አዕኑ ጨቢሃ ሬቲን መሲህ ኢሲን መገኒሃ ሩሂን ሄኡንንተገ ገወክዕኔ ዋለዕዬ።

¹² ህካን እኮቤቹሃ ማል ሰውቲሃ ጠገንቲነንተገ አኣተ ሪሆኖ ማላክዕኔ ጨቡ ሀላዕሉንከህዕኔ።

¹³ ጅሰሙክዕኔ ሂላ ሆጎ ኦዳተ አቲን ጨቢሃ አቶኖቹ፤ ጠዉ እኮጎሬ ሪሆች ሄኡ አደ ህጎ መገን አቲን ገወክዕኔ መገኒሃ አሰዬ፤ ህትን ጅሰመክዕኔ ጠሊላ ኦዳተ አቲን መገኒሃ አሰዬ።

¹⁴ ቲሱ አዕኑ ሄኡንንታሁ መገን አሰቶ ኣዜን ዮንተቤቹሃ ሕጊች ዋሮን እህበቤቹሃ ጨቡ ጠቆተ ሀሰሰኖበኣ።

¹⁵ ህከረ መ ይናም? ነኡ ሕጊች ዋሮን እሁዕን መገን አሰቶች ዋሮን ዮምቤቹሃ ጨብ አዕኑንደ? ሆሮ ህትጎተበኣ።

¹⁶ ገወክዕኔ መቶ መኒቹሃ ካድንችገ ጠገንቶኖተ ሆንጠኬንተጎሬ ህከ ጠገንቲነንተ መንቹሃ ካዲንቹ እሁክዕኔ ደጌንንተበኣንደ? ጨቢ ካዲመተ እኬንተጎሬ ጨቡ ሪሁተ ኤበኖ፤ ህትን መገን ካዲመተ እኬንተጎሬ መገኑ ፈየ አአኖህዕኔ።

¹⁷ አዕኑ ወዕናንከ ጨብ ካዲመተ እኬንታ እቅ፤ ጠዉ እኮጎሬ ቲሱ ቶጌንተ ትምርቲሃ ቀልቢን አዘዘንቲንተቤቹሃ መገኒሃ ገለቱ እሁንሰ።

¹⁸ ጨብ ርሶማች ነጠ ፋልቲን ፈይመ ካዲመተ እኬንታኣ።

¹⁹ አን ህትን መኒሃ ኣገኖ አፌን ጠወኣሚሁ ክዕኔሃ ኣገኖህዕኔገ ይደት፤ አዕኑ ከኒች ብርተ ጅሰመክዕኔ ኒጃሰ ካዲመ አቲን ሆንጠህሴንተ እቅ፤ ሁኩንን ጠሊላ እኮበኣ ዋቃሃ አዋንሰኖ፤ ጠዉ እኮጎሬ ቲሱ ጅሰመክዕኔ ፈይመ ካዲመ አቲን ሆንጠህሼ፤ እሰን ጠሊልመ አደ አዋንሰኖህዕኔ።

20 እዕኑ ጨብ ካዲመተ እኬንተ ወክት ፈይመ ሆጉተ አቴነንተ ግዳጁ ሞጮጪመኖህዕኔበእ እቅ።

21 ህከን ጠዊች ደእቴንተርቹ ም ዮኡ? ህከን ጠዊች ኤተሩስ ሬሁተ እኮቤቺሃ ቴሱ ሙልሰኖህዕኔርች ቤሉ መቱርቹሃ ደእቴንታበእ።

22 እኮጎሬ ቴሱ ጨብ ርሶማች ፋልቴን መገን ርስተ እኬንታእ፤ ህከን ወጥ ጠሊልመተ ደእቴንተ፤ መጨረሹስ ዘላለሚሃ ሄኤኑሃ ሄኤ።

23 መሰንትስ ጨብ ዋጉ ሬሁተ፤ ጠዉ እኮጎሬ መገን ሸልማቱ ቀርቹሃኔ መሲህ ኢስ መሳን ዘላለሚሃ ሄኤኑሃ ሄኤ።

7

ሕጊች ነጠ ፋሉ

1 አመኤ ኦሶ! እን ሕገ ደጋ መኒሃ ጠወአሚት፤ ሕጉ መኑ ፎሊን ዮ ጌሳን ገዘአኖሃ እሁስ ደጌነንተበእንደ?

2 ሞሳሌተ ሞኒሃ እኮ መንቹት ሞንሴ እኑ ፎሊን ዮ ጌሳን ሞንሴ እኒን ሕጊን ኡሱረንቶእተ፤ ጠዉ እኮጎሬ ሞንሴ እኑ ሬዮች ሞንሴ መንቹች ኡሱረንቶ ሕጊች ገፈረንቶእተ።

3 ህካን እኮቤቺሃ ሞንሴ እኑ ፎሊን ሄአን ዋሎ ጎናን ገልቶጎሬ ዝነተ አቶ ዬኖሴ፤ ጠዉ እኮጎሬ ሞንሴ እኑ ሬዮ ጎሬ ሞንሴ መንቹን ኡሱረንቶ ሕጊች ገፈርሲጭቶቤቺሃ ዋሎ ጎናን ገልቶጎሬ ዝነተ አቶ ዬኖሴበእ።

4 አመኤ ኦሶ! ህትን እዕኑ መሲህ ጅሰመ እኬንተቤቺሃ እስ ሬሆን ሕጊሃ ሬቴንታእ፤ ህካን እኮቤቺሃ ነኡ መገን ላልቹ ላልኖተ እዕኑ ዋሎ መንቹረ ሁኩንን ሬሆች ኬዕዮ መሲህረ ኤኬንታእ።

5 መሰንትስ ነኡ ማል ሰውትገ ሄዕናም ወክት ሕግ መሳን ኬአኖ ሂለ ሄዕላቸኔ ሬሆ ላልቹ ላልኖተ ጅሰምኔ ኣዘን ሆጉተ አአኖት እቅ።

6 እኮጎሬ ቴሱ ኡሱር አፎኔ ሕጊች ሬሆን መለዕለሜኖ ጌስ ጠገሞም ሕጊች ሂረሞም፤ ህካን እኮቤቺሃ ከኒች ኤተርን መገን እያኒን ሃዕር ሄኡን ሄዕናም ቤሉ ኑባቹ ሕጉ ዮኖ ሃሌን ሄዕናምበእ።

ሕግለክ ጨብተኔሃ

7 ህከረ መ ይናም? ሕጉ ገዉስ ጨብያንደ? ሆሮ ህትጎተበእ፤ ጠዉ እኮጎሬ ሕጉ ሄዕዮበእቃን ጨቡ መሃጎሬ ደንጋምበእ እቅ፤ መሰንትስ ሕጉ «ሂለርቹ ሄዕላቶት» ይዮበእቃን ሄዕላቱ መሃጎሬ ደንጋምበእ እቅ።

8 ጠዉ እኮኅሬ ሕጉ ዮበእ ጎሬ ጩቡ ሬዮሃ እኮቤቺሃ ጩቡ ትዛዝ አዲን እድለ ደእ ሂለ ሄዕላቸተ ጉዕመንከ ኣዜንከኤ ከለቆ።

9 አን ዋዕነ ሕጉ ዮበእ ወክት ፎሊን ሄኣም እቅ፤ ጠዉ እኮኅሬ ሕግ ትዛዙ አሜቸ ወክት ጩቢሃ ፎሉ ሄዕዮሰ እቅ፤ እኮኅሬ አን ሬዮም።

10 ሁኩ ፎል ኣሶተ ኣሰሞ ሕግ ትዛዙ ኢ አሌን ሬሁተ ኤቦ።

11 መሰንትሰ ጩቡ ሕግ ትዛዝ አዲን እድለ ደእ ጣንሴኤ፤ ትዛዝ መሳንን ሺኤ።

12 ህካን እኮቤቺሃ ሕጉ ጠሊላሃን፤ እሲን ከተበሞ ትዛዙንኩ ጠሊለ፤ ሀንቅያለከ ጡመሃን።

13 ህከረ ሁኩ ጡመ እኮ ጠዉ ኤሳሃ ሬሁተ ኤቦኤ ዩሃንዶ? ሆሮ ህትጎተበእ፤ ህከን ጡመ ጠው አዲን ሬሁተ ኤሳሃ ኤቦሁ ጩብየ፤ ሁኩን እኮሁ ጩቡ ጩብ እሁሰ ለሎታትለከ ጩቡ አበ ሂለ እሁሰ ትዛዝ አዲን ደገሞታት።

መን ኣዜን ዮ አጸንሽተኔሃ

14 ነኡ ሕጉ ጠሊለ አያኒሃ እሁሰ ደንጋም፤ ጠዉ እኮኅሬ አን ጠሊለ አያኒሃ እኮምበእ ጩብ ሮሶማተ ህረሞምያ መንቹ።

15 አን አኣተ ኢታም ጠዉ እሁሰን ግባም ጠዉ አኣምቤቺሃ ገይኤ ሆጉንተ አጥረመታምበእ።

16 ቴሱ አን ሀሰበርቹ አኣሚሃ እኮምኅሬ ሕጉ ጡመ እሁሰ ህከኒን ኢተቀማም።

17 ህት እኮች ህካን አአኖሁ ኣዜእ ዮእሃ ጩብ ቤሉ አኔበእ።

18 ኢ ኣዜን ህከረንገ ጅሰማንከኤ ጡሙ ጠዉ መቼርቹሁ ሄእበገ ደጋም፤ መሰንትሰ ጡመ ጠዉ ሄዕላቸምኅሬ አኣተ አታላምበእ።

19 ህትን አኣተ ሀሳም ጡመ ጠዉ እሁሰናን አኣተ ሀሰበ ሂለ ጠዉ አኣሚት።

20 ቴሱ አን ሀሾምበእ ሂለ ጠዉ አኣሚሃ እኮች ህካን አአኖሁ ኣዜንከኤ ዮእሃ ጩብ ቤሉ አኔበእ ዩሃን።

21 ጡመ ጠዉ አኣተ ሀሰን ሂለ ጠዉ አኣምገ አአኖኤ ዋሉ ሕጉ አአን ሄዕዮገ ደጋም።

22 መሰንትሰ አን ኣዜንከኤ መገን ሕገን ሙንደኣም።

23 ጠው እኮኅሬ አን አኣም ጠው ጉዕሙንኩ ሁኩ ዋሉ ሕጉ አአን ዬገ ለኣም፤ ኩ ሕጉንኩ ቀልቤንከኤ ኣገቀመኖ መገን ሕገን ሜጡብ ኣገቀመኖበእ፤ ኩ ሕጉንኩ ኤሳሃ ጩብ ዋልቃተ ጠገማምገ አአኖኤሃ እሁን ህከን ሕግገን መ አኣምኅሬ ወሰነኖኤ።

24 እን ሄንከ ሞርተዕዮምየ መንቹ! ከን ሬሀኖ ጅሰሚችኤ አይ ጡምሰኛኤ?

25 ቀርቼሃኔ መሲህ ኢሲን መገኒሃ ገለቱ ኢሉሰ፤

ቴሱ እን ቀልቤንከኤ መገን ሕጊሃ ጠገማም፤ እኮጎሬ ማለንከኤ ጩብ ሕጊሃ ጠገማም።

8

ሄኡ ኣሰኖ ጠሊሊ ኣያንተኔሃ

1 ህካን እኮቤቹሃ መሲህ ኢሲን ሄኣኖ መን አሌን ቴሱ ፍርዱ ፈረደመኖሰበኣ።

2 መሰንት መሲህ ኢሲን ዮ ሄኡ ኣሰኖ ጠሊሊ ኣያን ሕጉ ጩቢችለከ ሬሆ ሕጊች ሰዎልድማን ፋሽዮሄ።

3 ኒ ጩቤበኝ ሀል ዶሮተ ሕጊሃ ወልቀት ዮሰበኣ፤ ጠዉ እኮጎሬ ሕጉ አኣተ አታልባሃ መገኑ ጩቡ ዮበኣ ቤቱሰ ጩቤበኝ እንኮም ኒን መን ማቆን መን አዕይ ሶክ ጩብ ሀል ፈረጆሰ።

4 ኩን እኮሁ ማል ሰውትገ እሁዕነ ጠሊሊ ኣያኑ ሀሰኖጊን ሄዕናም ኒን ሕጉ ጠዕመኖኔህ ፈይመት ዋንቶታት።

5 መሰንትሰ ማል ሰውትገ ሄኣኖ ማል ጠወንከ ሰዉ ይታኣ፤ ጠሊሊ ኣያኒ ሰውትገ ሄኣኣኖ ጠሊሊ ኣያን ጠወንከ ሰውይታኣ።

6 ማል ጠወ ሰውዬ ሬሁተ ኤበኖ፤ ጠሊሊ ኣያን ጠወ ሰውዬ ሄኡለከ ወገሬት ኣሰኖ።

7 መሰንትሰ ማል ጠወ ሰውየኖ መንቹ መገን ሕጊሃ እዘዘመኖበኣቤቹሃለከ እዘዘሙ አታለምበሰቤቹሃ መገኒሃ መሰቹሃን።

8 ማል ሰውትገ ሄኣኣኖ መገኑ ሙንዲሲሶተ አታልታበኣ።

9 ሀንቅንከ መገን ኣያኑ ኣዜንተክዕኔ ሄዕዮች አዕኑሁ ህትን ዮንታሁ ማለን እሁዕነ ጠሊሊ ኣያኒንት፤ መሲህ ኣያኑ ኣዜሰ ዮሰበኣሁ አዪሁ መሲህየበኣ።

10 ጠዉ እኮጎሬ መሲህ ኣዜንተክዕኔ ሄዕዮች መሃ ማሉክዕኔ ጩብ መሳን ሬሆኅሬሁ ፎሉክዕኔ ፈይማን ሄኣኖሃን።

11 ህትን ኢሰ ሬሆች ኬሾሁ መገኑሃን፤ እሰ ኣያኑ ኣዜንከክዕኔ ሄዕዮ ጎሬ መሲህ ኢሰ ሬሆች ኬሾ መገኑ ኣዜንከክዕኔ ሄኣኖ ኣያንከሰ ሬሆኖ ማልሃክዕኔ ሄኡ ኣሰኖ።

12 እመኤ ኦሶ! ኤዶ ዮኔ፤ ጠዉ እኮጎሬ ሁኩ ኤዶሁ ማል ሃሽኣቶገ ሄዕናታበኣ።

13 ህዓን እኮቤቼሃ ማል ሃሽኣቶገ ሄኤንተ ጎሬ ሬቴነንተ፤ ጠዉ እኮጎሬ ጠሊሊ ኣያን ወልቃን ማል ሆጉተ ሽቴንተጎሬ ፎሊን ሄኤነንተ።

14 መገን ኣያኑ ኣዎንሰኖሰሩ ጉዕሙንኩ መገንተ እለ።

15 ህዓን እኮቤቼሃ ኣዕኑ «ኣበ! ኢ ኣና!» ይቴን ገእቶኖተ ኣታልሲሰኖሀዕኔ መገን እለተ ኣኣኖ ጠሊሊ ኣያን ቶጌንታ ቤሉ ዋጅቴን ሄኦኖተ ፈንቀሽ ኣግሰኖ ርሰማ ቀልብ ቶጌንታበኣ።

16 መገን ኣያኑ ኢ ኣያኒን ሜጡብ እክ ነኡ መገን እለተ እሁኔ ገይሃኔ መሰከረኖ።

17 ህትን መገን እለተ እንኮሚቶ መገኒቶ ረገዕናም፤ ህትን መሲህ ኢሰን ሜጡብ ኬዕምኝ ደዕኖተ እሰን ኦርጨቀምጎሬ እሰን ሜጡብ ረገዕናምረ።

አሜተኖ ኬዕምኝ

18 ከን ወክት ኦርሸት ከ ኤተሩ ኔሳሃ አሜተኖ ኬዕምኝን ሆሮ ቅጡ እሆተ ኣታለኖበእገ ኣዕይ ሰውያም።

19 ክልቀቱ ጉዕሙንኩ መገን እለት ለልታ በር ሄዕላተን ኣገርታኣ።

20 ክልቀቱ ተሰ እኮ ጠዉሃ ህግሽ ኣሰሞኡ፤ ሁኩንን ገይሰ ሄዕላቻን እሁዕነ ህትን እሆተ መገኑ ፈቀጀቤቼሃት፤ እኮጎሬ መገኑ ተብሳሃ ኣሰኖኡ።

21 ተብሶሰ ክልቀቱ ገዉንኩሰ በእ ርሰማቶ ሰዎልድማን ፋልኬዕይ መገን እለ ኬዕምኝ ዎምነቲን ቤቀማንቹ እሆታት።

22 ክልቀቱ ጉዕሙንኩ ከበሬ እለ ኒጠኛገኖ ኦርሸ ጨነቃን ሄኡሰ ደንጋም።

23 ጠዉ እኮጎሬ ኒጠኛ ኣሌን ኖኢሁ ጠለዕል ክልቀትያበኣ፤ መገኑ ዎሉ ኣሰቱተ ኣሰኖገን ኣጥራመተምሃ እኮሃ ጠሊሊ ኣያን ወዕኔሃ ቶንጎም ነኡ መገኑ ኦሱሰ እሁኔ ለሊሶተለከ ሬሄን ሸሚቶ ነጠ ኣዕይ ፋሾኔተ ኢሊ ኣዘኔ ጅሰማን ኒንጠንለከ ኣገዕርነን ደገማም።

24 ጡምኖሚሃ እንኮምጎሬ ጡሙኔ ዊመ ዊሚን ሀንቅ እክ ለሎተ ኢሊ ተብሴን ሄዕናም፤ ነኡ ጡምኖሚሁ ህከን ተብሴኔት፤ ጠዉ እኮጎሬ ተብሳ ኣዕናምርቹ ለሊኖሃ እኮጎሬ ተብሳሃ እሁሰ ፈቀኖ፤ ለሊኖርቹ ኣይ ተብሳሃ ኣኣኖ?

25 ለዕንበርቹ ተብሳ ኣዕናምጎሬ ኣታዕሊን ኣገዕርናም።

26 ህትን ህት መገኑ ኡጩ ሀሰሰኝኔ ጎሬ ደንጋምበእቤቼሃ ጠሊሉ እያኑ ሆንጌንከኔ ሀሰሰኝኔ፤ ላጋን ኩሌን አታሌንበ ሃሊን ጠሊሉ እያኑ ዱአ አእኖኔ።

27 መን ቀልብ መረመረኖ መገኑ ጠሊሉ እያን ሰውቱ መሃጎሬ ደገኖ፤ ጠሊሉ እያኑ መገንረ እኮሀኑኡተ ሸፈአኖ መገን ፍቃድጋት።

28 መገኑ ኢትታሀኑኡተለከ ሰውትሰገ ገእንቶሀኑኡተ መገኑ ጉዕመርቹንከ ጡምማተ አእኖገ ደንጋም።

29 ኩን እኮ መሰት ሄጭ ደጎሳሃ ቤቱሰ አጉዳገለከ ቤቱሰ ልግብያ አመሰ ኦሶ በሊች ሀንገፈ አሀኖገ መገኑ ሄጭ ወሰቹቤቼሃት።

30 ወዕና ወሰቹሰረ ገኤሰ፤ ህትን ህከ ገኤሰረ ወሰቹ፤ ህከ ወሰቹሰረ ኬዕምሾሰ።

መገን ኢተተ

31 ህከረ ከ ጠዊሃ መ ይናም? መገኑ ኔሳሃ ሀሰሰኝኔሃ እኮች ሀንበዕለመኖኔሁ አዬት?

32 መቼዋሰ ቤቲሃ አመዙዕነ ጉዕማንከኔ ህግሽ አሴ መገኑ ቤትንከሰ ሜጡበ ጉዕመርቹንከ ህትን አሰኝኔበእንደ?

33 መገኑ መጠርሰሃ አይ ከሰሶተ አታለኖ? ፈዩ አእኖሁ ገዋንከሰ።

34 እሰ አሌን ፈረደኖ አዬት? መሲህ ኢሰ እሰ አሌን ፈረደኖንደ? እሰ ኔሳሃ ሬዮሃ፥ ሬሆች ኬዕዮሃ፥ መገን መኬ አዲን አፋዕልዮሃንለከ ኔሳሃ ዱአ አእኖሃን።

35 መሲህ ኢሰ ኢታች አደ አእኖኔሁ አዬት? ኦርሽተንደ? ጭንቀተንደ? ሸረሙሃንደ? ጎሩዋንደ? ከልመተንደ? አደጋንደ? በገዙሃንደ?

36 እሰን

«ከተኔሃ ጉዕመ በርንከ ሸታኔ፤

ጎረጤኖ ሆለገ ዋለአምም»

የመም ከተበጠጋት።

37 እኮጎሬ ህከን ጠዋን ጉዕማንን ነኡ እቱኔ እሲን ከ ጠወ ጉዕመንከ ድለ አኢን ቄልታሀኑኡች በተዕናም።

38 መሰንትሰ ሬሆተጎሬ፥ ሄኡሃጎሬ፥ መላይከታጎሬ፥ ሹመተጎሬ፥ ቱሱ ዮ ጠወሃጎሬ፥ ኤተሮን አሜተኖሃ ጠወሃጎሬ፥ ህከን ዋልቃሞሃጎሬ፥

39 ጎት ዩሃጎሬ፥ ሙግ ዩሃጎሬ ህኩ ክልቀቱሀ እኮጎሬ ቀርቾሃ መሲህ ኢሰን ደእኖም መገን ኢታች አደ አኡተ አታለኖ መቼርቹሀ ዮበኢሃ እሁሰ ደጎም።

9

መገኑ እስራኤል መነ መጠሩስ

1 መሲሂን ሀንቅ ጠወኔም፤ ክዝባምበኦ፤ ጠሊላ ኣያኒን ኣዋነኖ ቀልቡኤ ክዝባምበእገ መሰከረኖኤ።

2 እቡ ሻዙትለከ ሙርተእቡ ጨነቀሙ ቀልቤንከኤ ዮኡ።

3 መሰንትስ እሉኤ እኮ ወገኒሃኤ ይ እን መሲሂኛ እደ እክ ቦሮሩ እልዮኤ እቃን ኢታም እቅ።

4 እስ እስራኤላውያናታን፤ ህትን መገኑ እስንተ እለስ ኣዕዮስ፤ ኬዕምኝስ ለሊሾስ፤ ወኣድ ላገተ ኣጎስ፤ ሕገ ኣሴስ፤ ሀንቅ ሰገድ ሴረ ለሊሾስ፤ ተብሴ ላገት ኣሴስ።

5 ህትን ወዕኔ እናኖች ኣሜቶእራን፤ መሲሁ ማሊን ኣሜቶሁ እስ ደቦቹት፤ እስ ጉዕሚቶን ሎረሃን፤ መገኒሃ ዘላለሚሃ ሹኩሩ ኢሉስ፤ ኣሚዕን!

6 ጠዉ እኮጎሬ መገን ላገት ሻረንቶኡ ዩሃበኦ፤ መሰንትስ እስራኤላውያኖ ዘርት ዊመ ዊሚን ሀንቅ እስራኤላውያኖተበኦ።

7 ህትን እብራሂም ዘርተ እኮሁ ጉዕሙንኩ ሀንቅ እብራሂም ኦሶተ ዩሃበኦ፤ ጠዉ እኮጎሬ «ዘርክ ገእንታኢሁ ኢሳቂንት» ዩሰቤቹሃት እቅ።

8 ህካን እኮቤቹሃ ርስሞ ዎቄን ጠለዕል ማሊን እለንቶሩ መገንተ እለበኦ፤ ጠዉ እኮጎሬ ዘርት እክ ዎለኦንታሩ ጠለዕል ተብሴ ላገተ ኦሱ።

9 ተብሴ ላገንት «ኣሜተኖ ዘማን ከ ወክት ፈንቀል ኣሜታም፤ ሳረ ለባ ጩል እልታኦ» ይታእተ እቅ።

10 ህካን ጠለዕል እሁዕነ ርብቀ ሜጦ መንቺች ሁኩንን ኣነኔ እኮ ኢሳቂች መልተተ እልቶተ ላፈተ እኮ ወክት

11 መገኑ መጠረኖሁ ለሙንኩ እለት እለንቱዕናን ሂለ እኮ ጡመ ኦቱዕነ ሄጭ

12 ሆጎን እሁዕነ እስ ገኡኖ ሃሊን እሁስ ለልሲሃ መገኑ ርብቀ «ሀንገፋ ማዕኒሃስ ጠገመኖ» ዩሴ።

13 ሁኩን እኮሁ «ያቁበ ኢትዮም፤ ጠዉ እኮጎሬ ኤሳ ግቦም» ዩመም ከተበሞጋት።

14 ቱሱ መ ጠወዕናም? መገን ኣዲን ሉጨንሹ ዮኣንዶ? ሆሮ ህትጎተበኦ።

15 መሰንትስ መገኑ ሙስ «መረርሲጩ ሀሾምሀኒሃ መረርሲጩም፤ ኣሙዛንስሀኒንከ ኣሙዛም» ይዮስ።

16 ህዓን እኮቤቺሃ መገኑ መነ መጠረኖሁ መኑ ሀሾ ሃሊን ህከረንገ መን ሆጎን እሁዕነ መገን መረርሲጪንት።

17 መሰንትሰ መጻፋን ፋራኦኔተኔሃ «ዋልቀኤ ኪን ለሊሶተለከ ሱዕሙኤን ኣዲንያ አሌን ጉዕማንን ደገሞተ ዋመ አዕዮንኬ» የመም ከተበሞኤ።

18 ህዓን እኮቤቺሃ መገኑ ሀሾሃ አዬሁ ማረኖስ፤ ህትን ሀሾሀ አዬሁ ቀልብሰ ዱድሰኖ።

መገን ኡሙዕርተለከ ማርቱተ

19 ቴሱ «መገን ሰውት ከሞተ አታለኖሁ ዮበኢች ሚሃ ሉጨንሺህኔ መገኑ ዋቀሰኖኔት?» ይቴነንታሃ እህኖ።

20 ጠዉ እኮጎሬ ኮ መንቸ! መገኒን ኦደሚሃ አታልታንቲሁ አት አዬት? ትብ ኦዳት መክሾሲሃ «ህት አት መክሶንቴኤሁ ሚሃት?» ዮተ አታለኖንዶ?

21 ትብ ኦዳት መክሰኖሴሁ መቶ ትቢች መት ኦዳተ ኬዕምኚሃ ህትን ዋልት ኦዳንተ ሂለርቺሃ መክሶተ ዋልቀት ዮሰበእንዶ?

22 መገኑ ኡሙዕርሰ ለልሶተለከ ዋልቀሰ ለሊሶተ ሀሽ በኢሃ ቅጥይቶ ኡሙዕሪ ኦዳተ ልግብ ወክት አታዕሊስ።

23 ህዓን አዕዮንኩ ዋዕናንከ ኬዕምኚሃ ቅጥአዕዮ ማርቶ ኦዳ ኬዕምኝሰ በትኝ ለሊሶታት።

24 ኔሳሃ መረርሲጭ ኦዳንተሰ ጠለዕል አይሁዲች እሁዕነ አይሁደ እህበ መኒች ገእዮኔ።

25 ሁኩንን እኮሁ መገኑ ሆሴ መጻፋን «ኢ ኡመትኤ እክበረ ኡመቱኤ» ይ ገእም፤

አተሞበእ ኡመትንከ አን ኢታም ኡመት» ይ ገእም፤

26 ህትን አዕኑ ኢሃ ኡመትበእ» ዬመሰ ቤቸን

«ሄእኖ መገን አለተ» የመንት ገእንታኦ» ዩሃን።

27 ህትን እስያሰ እስራኤል ኦሶተኔሃ ላገሰ ጎት አዕይ «ሄንከሃ እስራኤል ኦሶ ዋሊንቹ ባር ኣዘ ሽፋር ጌሰ እኮጎሬ እሳች ፈቆህኦች ጠለዕል ቀዉሰ ጡምታኦ።

28 መሰንትሰ ቀርቼ ደዕል ኡለ አሌን ሹል ፈረደኖ» ዬእ።

29 ህትን እስያሰ «ጎጎት ቀርቼ መገኑ መን ዘርተ ፌሾበእቃን ሶዶምለከ ጎሞር ከተምገ እንካም እቅ» ይ ዋዕናንከ ጠወዕዮ።

30 ቴሱ መ ይናም? ፈይመተ ሀሰቡ አይሁደ እህቡ መኑ ፈይመተ ደእቶኡ፤ ሁኩ ፈይመት አመዕነቲን ደገንታኦታን።

31 ጠዉ እኮጎሬ እስራኤል መኑ ሕገ አገሪን ደገንታ ፈይመት ሀሰን ሕገ አገሩ ሆኅቤቺሃ ፈይመተ ደኢሃ አታልቶበኦ።

32 «ሚሃት ፍይመተ ደኢቶበኦ?» ዩማእቃን እስ ፈይመተ ሀሰኢሁ አመዕነቲን እሁዕነ ሆኅን እኮቤቺሃት፤ ህካን እኮቤቺሃ ቆለኖ ክኖን ቆዕልቶኡ።

33 ሁኩንን
«ሁኩዕኑ መነ ቆለኖ ክኑ ጽኦናን አፋሻሞ፤
ሁኩ ክኑ መነ ቆለን ኡጀኖሃን፤
ህከን ክኖን አመዕነኖሁ አዪሁ ሙለኖበኦ» የመሞ ከተበሞገን
ህከን ክኖን ቆዕልቶኡ።

10

እስራኤል መኑ መገን ዎቃሃ አዎኑ ሆጉስ

1 አመኤ ኦሶ! እስራኤል መኑ ጡሞተ ቀልቤንተኤ አበ ሄዕላታሞለከ ዱኦ አኦሞ።

2 መሰንትሰ ሀንቅ ደገን እሁ ሆጉሃሰ ቤሉ እስ መገኒሃ አዘዘንቶተ ጠረኝሰ ሀሳከረ እሁስ ኣን ገውንኩኤ መስከራንሰ።

3 እስ መገን ፈይመተ ደጉዕናን ገይሰ ፈይመተ አዎኑ ሀሰ መገን ፈይማተ አዘዘንቶበኦ።

4 ህካን እኮቤቺሃ አመዕናኑት ጉዕሙንኩ ፈይቶተ መሲህ ሕገ ዊንሼኦ።

ጡሙ ጉዕሚንከ እሁስ

5 ሙስ «ሕገ አገሪን ደገንታ ፈይመተ አኦኖ መንቹ ሁኩ ሕጉ የኖሃ አኦኖ ጉዕሙንኩ ፎሊን ሄኦኖ» ይ ከተቦኡ።

6 ጠዉ እኮጎሬ አመዕነቲን ደጌኖ ፈይመተ «ቀልቤንከክ ሰማሃ አይ ፋለኖ?» ይቶት፤ ሁኩንን መሲህ ኡለተ ድርሲሃት።

7 ህትን ቀልቤንከክ «አዛቤን አይ ድረኖ?» ይቶት፤ ሁኩንን መሲህ ሬሆች ኡብሃት።

8 ጠዉ እኮጎሬ መ ይታኦ? «አፎንከክለከ ቀልቤንከክ እክ መገን ላገት ሆንጠኮኡ» ይታኦ፤ ህትን ነኡ ዱዱብሰናሚሁ አመዕነትተ ላገ።

9 እት ኢስ ቀርቹ እሁስ አፌንከክ መሰከርቶንትጎሬለከ መገኑ ሬሆች ኬሾሰገ ቀልቤንከክ አመዕንቶንትጎሬ ጡሞታንት።

10 መሰንትሰ መኑ ቀልቤስ አመዕን ፈየ እሆኖ፤ ህትን አፎንከሰ መሰከር ጡመኖ።

11 ጠሊሊ መጻፋን «እሲን አመዕነኖሁ አዪሁ ሙላኖበአ» የመሞ ከተበሞኡ።

12 መሰንትሰ መቼ ቀርቼ ኢሰ ጉዕሚንከ ቀርቼ እኮቤቺሃ አይሁደላከ አይሁደ እህበ መን በላን አደዶመት ዮበእ፤ እሰን ኡጭታስሀኑኡት ጉዕሚንከ በረከሰ በትሸ አሰኖሰ።

13 መሰንትሰ «ቀርች ሱዕመ ገአኖሁ ጉዕሙንኩ ጡመኖ» የመሞኡ።

14 ጠዉ እኮጎሬ አመዕንቱዕናን ሀት አት ገአቶተ አታልታአ? ሀትን እሰተኔሃ ሞጮጭቱዕናን ሀት እክ አመዕንታአ? ተማርሰኖ መንቼ ዮበኢሃ ሀት እክ ሞጮጭቶተ አታልታአ?

15 ተሸት ላገተ ዱዱብሰታሩ ሶሀንቱዕናን ሀት እክ ላገሰ ዱዱብሰቶተ አታልታአ? ሁኩንን «ጡመ ዱዱቡ ኩልታሩ አሜቱስ ሄንከ ተሸ የኖ?» የመሞ ከተበሞጋት።

16 ጠዉ እኮጎሬ እሰያሰ «ቀርቻ! ነኡ ጠወዕኖም ጠወ አይ አመዕንዮኡ?» ዩገን ጉዕሙንኩሰ ተሸት ላጋተ አዘዘንቶበእ።

17 ሀካን እኮቤቺሃ አመዕነቱ አሜተኖሁ ሞጮጭኒት፤ ሞጮጬንኩ መሲህተኔሃ ኩለንታ ላጋቺት።

18 ህንዴ ጠዕሞሀዕኔ፤ እሰ ሞጮጬ ሆጎቤቺሃትንዶ? ጠሊሊ መጻፋን

«ላገሰ ኣዱንያ አሌን ጉዕማንን ሞጮጬንቶኡ፤

ጠወኦርቹንኩ ኡለ ገበለ ኢልዮኡ»

የመሞ ከተበሞቤቺሃ ሀንቅንከ ሞጮጭቶኡ።

19 ቲሁ ጠዕሞሀዕኔ፤ እሰራኤላውያኑት ላገሰ ደጎበእ ዩሃንዶ? ሀካን ዩንበሰገ መሰ ሄጭ

«ኡመት እክበሀኑኡተ ሰጭቲነንተገ አኣንክዕኔ፤

አጥራመትበ ኡመት መሳን ኡመዕርቲነንተገ አኣንክዕኔ» ዩእ።

20 ሀትን እሰያሰ

«ኤሳሃ ሀሾበእ መኒሃ ደገሞም፤

አተኔንከ ጠዕሞትበ መኒንከ

ገዉእ ለሊሾም»

ይ መለል ጠወእዮኡ።

21 ጠዉ እኮጎሬ እሰራኤልተኔሃ «ሾከላከ አዘዘምበ መንበ በር ጉዕመንከ አንገኤ ሂሮም» ዩእ።

11

መገኑ እስራኤል መረጃ አመዘኑ

¹ ህንዴ ጠዕማም፤ መገኑ ኡመትስ ኡጀኖንዶ? ሆሮ ህትጎተበኢ፤ መስንትስ እን ገዳንኩእ እስራኤላውቹሃንለከ እብራሂም ዘፊቶ ቢንያም ደቦሃን።

² መገኑ ዋዕነ ሄጭ መረጭ ኡመት ኡጀኖስበኢ፤ እስራኤልተኔሃ እልያስ መገን ብሬን ኦጀገ መጻፉ የኖሃ ደገነንተበኢንዶ?

³ ህከን ወክቲን እልያስ «ቀርቶ! ነቢያከክ ሸቶኡ፤ ኬሳሃ ክትመ ሆንጠህሴኖሄ ጠረጴዛ ጉዕመንከ ድጅቶኡ፤ ከን ሜጡንኩእ ፈቆም፤ እስን ኤሳሃ ሸቶተ ሀሳኢት» ይእ።

⁴ ጠዉ እኮጎሬ መገኑ መ ይ ፈንቀሼስ? መገኑንኩ «አን ብኣለ» ይኖ ሸርኬሃ ሰገድቡ ለመለ ኩሜ መነ ገይሀእ ፊሾም» ይሰ።

⁵ ከን ዘማኔን መገን ኣሰቶን መጠረንት ፈቆ ቀዉ መኑ ዮኡ።

⁶ ምርጫስ ኣሰቶን እኮጎሬ ሆጎኒበኢ ዩሃን፤ ሆጎን እኮጎሬ ኣሰቱት ኣሰቱተ እሁስ ፈቀኖ።

⁷ እስራኤል መኑ ሀሶኢሃ ደዕቶበኢ? እኮጎሬ መገኑ መረጭስሩ ደዕቶኡ፤ ፈቆሩ ቀልብስ ዱድሶኡ።

⁸ ሁኩንን «መገኑ ቀልብስ ጀልኣዕዮስ፤ ህከኒሃ ከበሬ ኢለሬተ እሌንተስ ለኦበኢ፤ መጫንተስን ሞጮጮቶበኢ» የመም ከተበሞጋት።

⁹ ህትን ደዉድ

«ማዱስ አፈኖ ዋሻደ

ኡጀኖ ኤሎሃ እክ ኦሪሱንስ!

አቶ ሂሉርቹ ገይስ አሌን እሁን!

¹⁰ እልስ ለኣበእገ ቱንሲሱን፤

ረመዙስ ኦርሻን ጉዕመ ወክት ቁቾሃ እሁን» ይእ።

¹¹ ህንዴ ቴሁ ጠዕማም፤ እስራኤል መኑ ሉሶኢሁ ኬእበ ኡቡ ኡቡታትንዶ? ሆሮ ህትጎተበኢ፤ ህከን ወጥ እስ ሰጭቶተ እስራኤል መኑ ጨብ አቶ መሳን አይሁደ እህቡ መኑ ጡሙ ደኤእ።

¹² ጠዉ እኮጎሬ እስራኤል መን ሉጨንሹ ከን ኣዱንያ አል መረጃ በረከተ ደግሲሾችለከ እስ ኡቡ አይሁደ እህበ መረጃ በረከተ እኮቶ ጉዕመንኩስ ፈቆ እቃን ሄንኩ ልግቡ በረከት ደገንታ እቆ።

አይሁደ እህቡ መኑ ጡሙስ

13 ቲሱ ጠወኣሚሁ ክዕኔሃ አይሁደ እኬንበ መኒሃት፤ አይሁደ እኬንበ መኒሃ ሶሀምሚሃ እኮምቤቺሃ ክድማተኤ አቡ ኬዕምኙ ዮኤ።

14 ካን አኡኤ ማል እሉእ እኮእረ አይሁደ ሰጭታጋ እኢሃት፤ ከን ሃሌን አይደጎ እሳች መት-መቼሰ ጡምታገ አኦተ አታላሚሃ እሆተ አታለኖ።

15 መሰንትሰ አይሁድ ኡቡ ኣዱንያ አሌን ዮ መኒሃ መገኒን ሀራዕረሙ ኤቦች እሰ መገን አደ ፈንቀሉንገ ሀት እሆኖ? ሁኩን ሬሆች ኬእተገ።

16 መቶ ደን ቡኮች ወዕኔ እሰ መገኒሃ ጠሊሉሃ እኮች ቡኩት ጉዕሙንኩ ጠሊለ እካእ፤ ህትን መቶ ሀቅ ጠጹ ጠሊለ እኮች ሀሙሰ ጠሊላኦተ እካእ።

17 አይሁዱ ጋሮ ወርች ሀቅጋት፤ እሰ በሊች መቼ ጌሱ ሀሙሙርተዕይ ኡባንለከ አዕኑ ኡድም ወርች ሀመ እኬንታሩ እሰቤቸን እኬን *ጠጹሰ ዱንያተለከ በረከተ ቤቀንቴንተረ እኬንተጎር

18 ህከን ቢጠንት ኡቦ ሀማን ቦንቶት፤ እኮጎሬ ቦንቶንትጎር ጠጹሰ ኬሳሃ እጅዮሄ ቤሉ ጠጸ እጅቶንቲሁ ኬሳሃ እሁ ሆኩክ ደግ።

19 ጠዉ እኮጎሬ «ሀማከት ቢጠንት ኡቦኢሁ ኦን እሰቤቸን እሆታት» ይቲነንታሃ እሆኖ።

20 ሁኩን ሀንቀሃን፤ እሰ ቢጠንቶኢሁ አመዕኑ ሆጎቤቺሃት፤ አዕኑ አመዕነት መሳን አጸቀንቴን ኡርቴንታእ፤ ህካን እኮቤቺሃ ዋጅዬ ቤሉ ቦንቶኖቺ።

21 መሰንትሰ መገኑ ዋዕናሃ ነጹ ሀሚሃ አሙዝባች ኬሳሃ አሙዝኖበእ።

22 ቲሱ መገን አሙዙሰለከ ዋጅሲሱሲ ለእ፤ ዋጅሲሱንኩሰ ለሊሰኖሁ ኡቦ ሀዕኑኡአሌኒት፤ እኮጎሬ መገን አሙዞንከሰ ጠረኝት ሄኦንትጎሬ ኬሳሃት፤ ሁኩን ዮበእ ጎሬ አዕኑሁ ሙርተኤን ኡቤነንተ።

23 እሰን አመዕኑ ሆጊች ፈንቀልቶጎሬ ዋዕናሃ ሙርተኦ ቤቸን ፈንቀልት ኣጋእ፤ መሰንትሰ መገኑ ወዕኔሰቤቹ ፈንቀሽ ኣግሶሰተ አታለኖ።

24 አት ክልቀቴንከክ ኡድም ወርቹ ሀቀ እኮሀኒች ሙርተእ ከለቀንቶንትገ እሁዕን ጡመ ወርቹን ኣጎንቲች በትሸን ሁኩ ክልቀቴንከሰ ዮሰ ሀሙ ገይሰ ወርች አሌን ሀት ኣጋበእ።

* 11:17 እሰቤቸን እኬን፡- ዩ እቡራኑት መት-መቶረ ጡመ ላልቹ ላለኖ ሀቅ ሀመ ሙርት ጠረኝ ጠጹ ዮ ጌዴላን ፊልት አጉጣቀመኖ ሀቂች ጡመ ላልቹ ላለኖ ሀመ ሙርት ጡመ ጠጹ ዮሰ ጌዴላን ካሴናን ህከ ካሰሞ ሀመ ገይሰ ሀምገ አዕይ ጡመ ላልቹ ላለኖገ እአኖ።

መገን ማርቱት ጉዕሚንከ እሁሰ

25 እመኤ ኦሶ! ቀልባመተ እኬንታሃ አጉዲንከሀዕኔ፤ ህካን እኮቤቹሃ ማጠጥ ጠወ ደጎኖተ ሀሳሞ፤ አይሁደ እክበሩ መሲህ አመዕንት መገኑ ሀሰኖ ወሊንሽ ኢልቶተ ኢላ ዱድሰኖ አያኑ መት-መቶ እስራኤላውያኖ አሌን እኮ።

26 ህትን

«ጡምሳንቹ ጽኒኒች አሜተኖ፤
ያቁብ ዘሬች ጉዕሚችን ሂልመተ ከመኖ፤

27 ጨብሰ ፈቁን ዬም ወክት
ክዕኔኤን ኣጋም ወኣድ ላገት ከኒት» የመም ከተበሞገን
እስራኤል መኑ ጉዕሙንኩ ጡምታአ።

28 እስራኤላውያኑት ተሸት ላገተ ሞጮጮ ግቢንከሰ ክዕኔተኔሃ መገን ዲነ እኮኤ፤ እኮጎሬ መጠረሚን አናኖሰተኔሃ መገኑ ኢተኖሰራን።

29 መሰንትሰ መገን ኣሰቱትለከ መገን መጠሩ ዶረምበሃን።

30 አዕኑ ዋዕናሃ መገኒሃ አዘዘሙ ግቤንታአ፤ ቴሁ እኮጎሬ እስራኤል መኑ አዘዘሙ ሆጊን ማርቱተ ደዕቴንተገን

31 አዕኑ ደእቱንተ ማርቱተ እሳሁ ህከ ማርቱተ ደእቶተ ቴሁ አዘዘንቶበአ።

32 መሰንትሰ መገኑ ጉዕሚንከ መኒሃ ማርቱሰ ለሊሶተ ጉዕሙንኩ መኑ አዘዘምበገ አዕዮ።

መገኒሃ ሆንጠኮ ገለት

33 መገን ቀባጡትለከ ሀይመት ደጉሄንከ ጥዕላሽሃን? ፍርዱሰ መረመሬን እሌንቡሃን፤ ዋቆንኩሰ ለልበሃን።

34 «ቀርች ቀልብ ጠወ ደገኖሁ አዬት?
እሱሃ ሸዘኖሲሁ አዬት?

35 መገኒሃ ሌቆሰኖሁ
ሌቆሾንከ ኣአኖሁ አዬት?»

36 መሰንትሰ ጉዕሙርቹንኩ እሲች፥ እሲንትለከ እሲሃት፤ እሲንከ ዘላለሚሃ ኬዕምኙ እሲሃ እሁሰ! ኣሚዕን!

12

መገኑ ካደሚሃ ሀት ሄኡ ሀሰሰኖ ጎሬ

1 ቲሁ አመኤ ኦሶ! ጅሰመክዕኔ መገኒሃ አደ እኮሃ ሙንዲሲሰኖለከ ሄአኖ ክትመ አቴን ሆንጠህሶኖተ መገን መረርሲጨን ኡጫንክዕኔ፤ ሁኩንን አዕኑ መገኒሃ ሆንጠህሶኖተ ሀሰሰኖሃ ሀንቂን እኮ ሰገዱዋክዕኔ።

2 ህትን ጡመ ሙንዲሲሰኖለከ ንጃሱ ዮበእ መገን ሰውቱ መሃጎር አጥራመቱን ደጎኖተ ቀልቡክዕኔ ሃዕሮ እክ ሄኡክዕኔ ደረመን ቤሉ ከን አዲንያ አል መነ አጉደኖቹ።

3 «ክዕኔ በላን መት-መቱንኩክዕኔ መገኑ አሴህዕኔ አመዕነት ጌሲን ጡምማን ሰውዩን ቤሉ ገይሰተኔሃ ሀሰሰኖህኒች በትሽ ቦኒን ሰውዩንከ» ይ መገኑ አሴኤ አሰቶን ሸዛንክዕኔ።

4 መቶ ጅሰማን ልግቡ ብሊቱ ዮኔህንገለከ ህከን ብሊት ሆጉት ጉዕመንት አደ እኮገን

5 ነኡ ሄንከ ልግብ እንኮምጎሬሁ መሲሁ መቱሃ ጅሰመ፤ መቶ ጅሰም ብልት እንኮምቤቺሃ ገገይንከኔ ሜጡ እንኮም።

6 መገኒች አሰንቶኔ አሰቶገን አደዱ አሰቱት ዮኔ፤ ራገ ጠወኡ እኮጎሬ አመዕነትኔ ጌሲን ራገ ጠወዕኑን።

7 ካደመኖሁ ክድማንከሰ ጠረኙን፤ ተማርሰኖንኩ ተማርሰንከሰ ጠረኙን።

8 ህትን ሸዘኖሁ ሸዘንከሰ ጠረኙን፤ አሰኖንኩ ቀልቢችሰ ኬሽ አሱን፤ ገሸኖንኩ ጠረኝ ገሹን፤ መረርሲጨኖንኩ ሙንዲኖን መረርሲጨን።

9 ሰንሰንት ዮበኢ ሀንቅ ኢተት ሄኡንክዕኔ፤ ሂላ ጠወ ግቤ፤ ጡመርቹ አዎኙ።

10 ህትን ገገዉክዕኔ ጠረኝቴን ኢተቀሜ፤ መት-መቱክዕኔ ኬዕምሼ።

11 ዋንክዕሉ ዮበኢሃ ጠረኝቴን ዊመ ቀልቢን ቀርቹ ካደሜ።

12 ተብሴን ሙንደዕዬ፤ ኦርሸተ እጀቅዬ፤ ጉዕመ ወክትንከ ዱኣ አዕዬ፤

13 አመዕንቶ አመኡሱተ ኦርሸሰ ወክት ሀዕልዬ፤ ኮሀ ቶጌ።

14 ሸርታህዕኔረ ማሰዕዬ፤ ማሰዕዬሰ ቤሉ ቦርርቶኖቹሰ።

15 ህትን ሙንደኣህኡኡን ሜጡብ ሙንደዕዬ፤ ኦኣህኡኡን ሜጡብ አዕዬ።

16 ገገውንኩክዕኔ ኢታን ሄዕዬ፤ ገውክዕኔ ሎርሱ አጉርቱን ቡጥቻኖን ሜጡብ ሄዕዬ * «ኢ ቤሉ ዋሉ ደገኖሁ ዮበኢ» ይቶኖቹ።

12:5 1 ቆሮ. 12:12። 12:8 1 ቆሮ. 12:4-11። 12:14 ማቶ. 5:44፤ ሉቃ.

6:28። * 12:16 ቡጥቻኖን ሜጡብ ሄዕዬ፡- የኖሁ ህንቄመ ሆጉተ አኢሃ ኤኩ ይዬ ዩሃን።

17 ጉዕማንከ መን ብሬን ጡመ ጠወ አዕዬ ቤሉ አይሃዉ ሂላ አዕዮ ወጥ ሂላ ጠወ አቴን ፈንቀሽቶኖቹ።

18 ህትን አታልሲሾህዕኔ ጎሬ መኒን ጉዕማንን ወገሬቲን ሄዕዬ።

19 ኢ ጃላ፥ «ቀርቼኔ መገኑ ገዱት ፋሉ ኢሃን፤ እን ገዱት ፋላም» ያመም ከተበሞቤቹሃ መገን ኡሙዕሬተ ቤቹ ኣሰዬ ቤሉ አዕኑ ገዉክዕኔ ገዱት ፋልቶኖቹ።

20 ህከን ወጥ ባለጋሩክ ጎራዬጎሬ እትሰሰ፤ ሰገቦሰጎሬ አግሰ፤ ህካን እኣንከክ ሙልሳንት።

21 ህካን እኮቤቹሃ ሂላ ጠወ ጡመ ጠወ አኢን ቄል ቤሉ ሂላ ጠዊን ቄለንቶት።

13

ሹማተ አዘዘሙ ሀሰሰኖሃ እሁሰ

1 ዳኝነቱ ጉዕሙንኩ ኣሰመኖሁ መገኒች እኮቤቹሃለከ ቴሱ ዮ ዳኛኑት መገኑ ዳኛ አዕዮሰረ እኮቤቹሃ ሙኑ ጉዕሙንኩ ገሽታ ሹማተ አዘዘሙ ሀሰሰኖሰ።

2 ህካን እኮቤቹሃ ዳኛኖን ሂልማን ኬአኖሁ ጉዕሙንኩ መገን ትዛዝ ቶገኖበኣ፤ አዘዘምባሁ ጉዕሙንኩ ገይሰ አሌን ፍርደ ኤበኖ።

3 ሹመት ሂለርቹ አታ መን ቤሉ ጡመርቹ አታ መን ዋጅሲባበኣ፤ ሹሙ ዋጅሲሰኖሄበዕገ ሀሰንንዶ? ጡመርቹ እኣ፤ እሰን ገለትጨኖሄ።

4 መሰንትሰ እሰ ሂላ አታረ ቀጠአኖ መገንየ ካድመ፤ ጠዉ እኮጎሬ ሹሙ ብሰ ቆዕረኖሁ ጠለዕላን እህበቤቹሃ ሂለርቹ አቶንትጎሬ ሹመ ዋጅ፤ ህትን እሰን ሂለርቹ አሰታእረ ቀጠኣን መገን ኡሙዕርተ ለሊሰኖሃ መገንየ ካዲንቹ።

5 ህካን እኮቤቹሃ ሹማተ አዘዘሙ ሀሰሰኖ፤ ሁኩንን ኡሙዕርተ ዋጅን ጠለዕላ እሁዕን ቀልቡክዕኔ ቀነጠኖህዕኔቤቹሃት።

6 አዕኑ ግብር ባቴንነታሁ ሹማተ አዘዘሙ ሀሰሰኖህዕኔቤቹሃት፤ መሰንትሰ ሹመት ህካን እኢን መገኒሃ ካደንታአራን።

7 ቴሱ ጉዕማንከ መኒሃ እኡ ሀሰሰኖሃ አዕዬ፤ ግብር ባቴ ሀሰሰኖህኒሃ ግብረ ባቴ፤ ቀረጠ ባቴ ሀሰሰኖህኒሃ ቀረጠ ሙሬ፤ ዋጅ ሀሰሰኖህኒሃ ዋጅዬ፤ ኬዕምኹ ሀሰሰኖሰህኒሃ ኬዕምኝ ኣሰዬ።

መት-መትን ኢተቀምተኔሃ

8 ገገዉክዕኔ ኢተቀሜ ቤሉ ኦዬ ሌቆሁ አሌክዕኔ ሄኡንከ፤ መሰንትሰ ኦሌቹሰ ኢተኖሁ አዪሁ ሕጉ የኖሃ አኦኖ።

9 «ዝነተ አቶት፤ ሸቶት፤ ሞግቶት፤ ዎሎ መንርቹ ሄዕላቶት» የኖ ትዛዙሁ ዎሉ ትዛዙ ጉዕሙንኩ «ኦሌቹክ ገይክገ ኢት» ይታ ላጋን ዊሞኡ።

10 ኢተት ሄኡ ጎሬ ዎሎ መን አሌን ሂለርቹ አኦኖበኦ፤ ህካን እኮቤቹሃ ኢታን ሕጉ ዊመ እሀኖ።

11 ቴሱ ግሰኛች ኬኤነንተ ወክቱ እሌገ ደጌ፤ መሰንትሰ አመዕንኖሞ ወክቲች ጡምናም ወክቱ ቴሱ ኒቤቹ ሆንጠኮኡ።

12 ሀንከዕርት ህጎተ አኬኮኡ፤ በሩሰ ሆንጠኮኡ፤ ህካን እኮቤቹሃ ቱንሰቸን አዕናም ሆጉተ ጌኝ አዕኖ፤ ኑር ኦል ኦድኑተ ኦደዕኖ።

13 ህካን እኮቤቹሃ በራን እንካምሀንገ ሀሰሰኖገ ሄዕኖ ቤሉ ሄዕናሚሁ ቦለቹን፤ ሰከሪን፤ ዝነተ አኢን፤ ጅሰመ ሆጎዲን፤ ኦዲንለከ ሞቀኛማን እሀንከ።

14 ጠዉ እኮጎሬ ቀርቹ መሲህ ኢሰ ኦደዕዬ ቤሉ ሄዕላተኖርቹ ዊንሾተ ማልሃክዕኔ ሰውይቶኖቹ።

14

መን አሌን ፈረዱ ገበእባሃ እሁሰ

1 አመዕነቲን ሆጎ መንቹ ኢታን ቶጌሰ ቤሉ ሰውትሰ ህንቆኖቹ።

2 ጉዕመርቹንከ እቱ ሀሰሰኖሰገ አመዕነኖሁ ዮኡ፤ እኮጎሬ አመዕነቲን ሆጎሁ ጠለዕል አታክልተ * እተኖ።

3 ህካን እኮቤቹሃ እኮሰርቹ እተኖ መንቹ እትበ መንቹ ህንቁንከ፤ ህትን እትበ መንቹ እተኖህን አሌን ፈረዱንከ፤ መሰንትሰ መገኑ እሱ ቶጎሰ።

4 ዎሎ መንች ካዲም አሌን ፈረዶተ እት አዬት? እሰ ኡሬጎሬ ህከረንገ ኡቦጎሬ ቀርቹሃሲት፤ እሱ ቀርቹ ኡርሶሰተ አታለኖቤቹሃ ኡረኖ።

5 ህትን መቱ መንቹ መቱ በር ዎለኢች ቆሀኖገ ሰውየኖ፤ ህትን ዎሉ በሩ ጉዕሙንኩ ቅጡወ ይ ሰውየኖ፤ ህካንን ጉዕሙንኩ ገግሰ ቀልቢን አጥራመች ደጉ ሀሰሰኖሰ።

6 ህትን በር ከበጀኖ መንቹ ቀርቹ ኢሰ ከበጀተ ይ ከበጀኖ፤ እተኖንኩ መገኑ ገለትጨኖሲቤቹሃ ቀርቹ ኢሰ ከበጀተ ይ እተኖ፤

13:9 ፋል. 20፥13-15፤ 17፤ ዘዱ. 5፥17-19፤ 21፤ ሌዌ 19፥18። * 14:2 አታክልተ-ሀሚሉ፥ ድንቹ፥ ካርተለከ ቀይሰርገ ዮእራን።

እትበ መንቹ ቀርቹ ኢስ ከበጀተ ይ እተኖበኣ፤ እሰን መገኑ ገለትጨኖ።

7 ኒቶ ገይሀሰ ሄአኖለከ ገይሀሰ ሪሀኖ መንቹ ኖበኣ።

8 ህካን እኮቤቹሃ ፎሊን ሄዕኖም ጎሬ ቀርቶ ኢሲሃ ሄዕኖም፤ ሪኖምጎሬ ቀርቶ ኢሲሃ ሪኖም፤ ህካን እኮቤቹሃ ሪኖምጎሬለከ ሄዕኖም ጎሬ ነኡ ኢሰራን።

9 መሰንትሰ መሲህ ሬቶህኡተለከ ፎሊን ኖህኡተ ቀርቹ እሆተ ሬይ ሬሆኑ ኬዕኖኡ።

10 አመክ ቤት አሌን ፈረዳንቲሁ ሚሃት? ህከረንገ አመክቤቱ ህንቃንቲሁ ሚሃት? ነኡ ጉዕሙንኩኔን መገን ፍርድ ቦርጭመ ብሬን ኡርናም።

11 «ቀርቹ መገኑ እን ሄአሚሃ እኮምቤቹሃ

መኑ ጉዕሙንኩ ኤሳሃ ሰገደኖ፤

አረቤንከሰ እን መገኑ እሁእ መሰከረኖ» የመም ከተበሞኡ።

12 ህካን እኮቤቹሃ መት-መቱንኩኔ ገይኔተኔሃ መገኒሃ መሰለ አሰናም።

መኒሃ ጉፍቹ እሂቶ አገዕሩ

13 ህካን እኮቤቹሃ መት-መትኔ አሌን ፈረንዲንከ፤ ህከን ወጥ አዪሁ አመሰ ቤቲሃ ጉፍቹ እህበገ ህከረንገ አመሰቤቱ ሉሲሰኖበእገ አገዕሩን።

14 እን ቀርቶ ኢሰሃ እኮምቤቹሃ እቸት ገይንተሴ ኒጀሰ እሁ ሆጉሰ አጥራመኑ ደጎም፤ እኮጎሬ መቱርቹሃ «ንጀሰየ» የኖ መንቹሃ ሁኩን ንጀሰ እሀኖሰ።

15 እት እታንት እቻን አመክቤቱ ሻዘኖ እኮቶ ኢታን ፈንቀላንቶንትበኣ፤ ህካን እኮቤቹሃ መሲህ እሰተኔሃ ሬኖ መንቹ እታንት እቸ መሳን በአኖገ አቶት።

16 ህትን ክዕኔሃ ኖ ቡመ ጠወ ህንቄኖገ አቶኖቹ።

17 መሰንትሰ መገን ዋምነቱ ጠሊሊ አያኒን እኮ ፈይመተ፤ ወገሬትየለከ ሙንዲኑተ ቤሉ እቴኖሃለከ አጌኖሃ ጠወበኣ።

18 ከን ሃሌን መሲህ ካደመኖ መንቹ መገኑ ሙንዲሲሰኖ፤ ሁኩ መንቹ መንህኔን ማሰአሞአሃን።

19 ቴሱ ወገሬቱ ደገመኖሁለከ ገገዉኔ ጠረኝጨቀማም ዋቃሃ አዎኑን።

20 እቴኖርቹሃ ይቴን መገን ሆጉተ ቤንሱንከ፤ እቸት ጉዕሙንኩ ነጠሃን፤ ጠዉ እኮጎሬ ዋሉ መነ ሉሲሳ እቸተ እቱ ሉጨንሻን።

21 ህዳን እኮቤቺሃ ማለ እቱ ግቡ ህከረንገ ወይን ጠጆ አጉ ግቡ ህከረንገ መነ ሉሲሰኖርቹ መቱርቹሃ እኡ ሆጉ ጡመሃን።

22 ህትን ኬሳሃ ዮሄ አመዕነቱ መገንለከ ኪ በላን እሁን፤ ጡመ ይ እኦኖ ጠዋን ቀልቡስ ቀነጠኖ ጠዉ ዮሰበኢሁ ማሰአሞእሃን።

23 ጠዉ እኮጎሬ ሸከኖ መንቹ እቸጎሬ አመዕነቱን እኮበእቤቺሃ እስ አሌን ፈረደሞኡ፤ መሰንትሰ አመዕነቱን እህበርቹ ጉዕሙንኩ ጩብሃን።

15

ዋሉ መነ ሙንዲሲሱ ሀሰሰኖሃ እሁስ

1 ነኡ አመዕነቱን ጠረኛኑት እንኮሞኛ ላኖ እጅነተ እጁ ሀሰሰኖኔ ቤሉ ገዉኔ ጠለዕለ ሙንዲሲንሳሞረ እሁ ሀሰሰኖኔበእ።

2 መት-መቱንኩኔ አመዕነቱን ጠረኛኖተ ደግለለኖስ ጠወ አኢን ዋሉ መነ ሙንዲሲንሱ።

3 መሰንትሰ «ኬሳሃ ቦርሬመ ቦርሬ ኢ አሌን እኮኡ» የመሞ ከተበሞገን እኮስ ቤሉ መሲህ ገዉስ ሙንዲሲሾበእ።

4 ጠሊሊ መጻፋቶ ደንጋሞ አታዕሊንለከ ሰበሪን ኔሳሃ ተብሶሁ ሄኔኔተ ከኒቶ ብርተ ከተበንቶሩ ጉዕሙንኩ ተማርሰቶኔተ ከተበንቶኡ።

5 አታዕልለከ ሰብር ቀርቹ ገገውንኩክዕኔ መሲህ ኢስ ሞሳልተ አዋንቱን ሜጡብ ሄኤኖ ሰውት ኣሱንክዕኔ።

6 ህትን ቀርቾ መሲህ ኢስ እኑ መገኑ መቶ ቀልቢንለከ መቶ ላጋን ኬዕምሴነነተገ እኡንክዕኔ።

እንጂል ላገት አመዕንበ መኒሃ ዲዲብሰሙስ

7 ህትን መገኑ ኬዕምኝ ደኦተ መሲህ ገይሲሃ አዕይ ቶጎኔገን ገገዉክዕኔ ቶቃቀሜ።

8 ህዳንን ጠወእን መገኑ ወዕኔ አናካተ ኣሴ ተብሶሁ እሆተለከ መገኑ ሀንቅ እሁስ ደጎኖተ መሲህ አይሁድ ካዲንቹ እኮ * ዩሃን።

9 መሲህ አይሁድ ካዲንቹንኩ እኮንኩ እኮ ዋልት መሰት አይሁድ እክበሩ መገኑ መረርሲጭሰተኔሃ ገለትጭቶታት፤ ሁኩንን፡- «ኡመት በላን ገለትጫንኬ፤

ሱዕምሃክ መዝሙራን ገለት ሆንጠህሳም» የመሞ ከተበሞጋት።

10 ህትን፡-

15:3 መዝ. 69፡9። * 15:8 መሲህ አይሁድ ካዲንቹ እኮ፡- የኖሁ ግርኩ ጡርከሞ ካዲንቹ የኖ። 15:9 2 ሳሙ. 22፡50፤ መዝ. 18፡49።

«አዕኑ አይሁደ እኬንቡሩ
መገኑ መጠሮ ኡመቲን ሜጡብ ተሽ ዩንክዕኔ» የመሞ
ከተበሞኡ።

11 ህትን

«አዕኑ አይሁደ እኬንቡሩ ቀርቼ መገኑ ገለትጭዬ፤
ህትን ኡመቱ ጉዕሙንኩ ገለትጩን» የመሞ ከተበሞኡ።

12 ህትን እስያሰ

«እሴዬ ዘሬኝ ከለቀመኖሁ አሜተኖ፤
አይሁደ እህብ ኡመት ገሽኖ ዋና እህኖ፤
እስን ተብሳሰ እስ አሌን አታኦ» የመሞኡ።

13 ተብሶክኔ ጠሊሊ አያን ዋልቃን ነጸን መሮታ ተብሴ መገኑ
እሱን አመዕኒንከክዕኔ ሙንዲኑተለከ ወገሬት ዊንሸ ኣሱንክዕኔ።

ጳውሎስ መለል ከተቦ መስተ

14 አመኤ አሶ! አዕኑ ጡምማን ዊንቴንታእረ እኬንተጋ፥ ደረን
ዊንቴንተረ እኬንተገለከ መቱ መቱክዕኔ ተማርሱ አታልቴነተገ
አጥራመኝ ደጎም።

15 ጠዉ እኮጎሬ መት-መቶ ጠውተኔሃ ቃግሶህዕኔተ ይ መገኑ
ኣሴኤ ኣሰቶን መለልን ከተቦንክዕኔ።

16 ሁኩ ኣሰቱት ኣሰንቶኤሁ መገን ተሸት ላገተ አይሁደ እህቡ
መኒሃ ዱዱብሲን ቂሰኝገ እክ መሲህ ኢሰ ካደሞታት፤ ህካን
እኮቤቹሃ አይሁደ እህቡ መኑ ጠሊሊ አያኒን ማሰኣንቶተለከ መገኑ
ሙንዲሲሰኖ ክትመ እክ ሆንጠኩንተ ካደማሚት።

17 ህከን መሳን መሲህ ኢሲን መገኑ ካደሞተ አታዕለንከኤ
ቦናም።

18 አይሁደ እክበሩ አዘዘንታገ አኢሃ መሲህ ኢ ላጋንለከ ሆጎ
መሳን አዕዮ ጠው ቤሉ መቱርቹሃ ጠወኢሃ መለላምበኦ።

19 ህትን ሎርሎረ እጅብቶንለከ ገረሞሲጩኖ ሆጎን ጠሊሊ
አያን ወልቃን ዬሩሳሌሚችለከ እዘጋገች ጀመር እልዋሪቆን ዬሩ ባዱ
ኢለ መሲህ እንጂለ ሹል ተማርሰዮም።

20 ህትን ጉዕመ ወክት ሃሽኣቱኤ ዋሉ መኑ ቀበቦ ቀበብ አሌን
እጃሩ እሁዕን መሲህ ሱዕሙ ሞጮጨሞበእቤቹን ተሸት ላገተ
ዱዱብሰሃን።

21 ሁኩንን፡-

«ከኒች ብርተ እስተኔሃ መቱርቹሁ ኩለሞሰበኦ መኑ ለኣኦ፤
እስተኔሃ ሞጮጭትበሩ አጥራመታኦ»

የመሞ ከተበሞጋት።

ጳውሎስ ሮሞ ከተመ መሮተ ያዱስ

22 ልግብ ወክት ክዕኔቤቹ አሜቶተ አታሉ ሆኅሚሁ ዋዕነ ሄጭ ጠወዕዮም መሳኒት።

23 ጠዉ እኮኅሬ ቴሱ ከን ኦሎን ዮ ባዶን አኣም ቤቹ ዮበእቤቺሃ፡ ህትን አበ ዘመኒች ኬሽ ክዕኔተ ለኦህዕኔተ አቡ ሃሽኣቱት ዮኤቤቺሃ

24 እስፔን ባዱ መራም ዋቄ አዲን ለኦህዕኔተ ያጅም። ቀዋ ጌሲሃ ክዕኔኤን ሜጡበ ተሽ ይሃዕኔ አገሮሚች ኤተሮን ዋቃኤ ጀመሮተ አታልሲሰኖኤርቹ ሀዕልቴነንተኤገ ተብሳ አኣም።

25 ቴሱ እኮኅሬ አመዕናኖተ ደግለለኖርቹ ኣእ ዬሩሳሌመ መራም።

26 መሰንትስ መቄዶንለከ አካይ ባድ አመዕናኑት ዬሩሳሌም አመዕናኖ በላን ዮ ቡጥቻኖተ ሀዕልቶተ ሀሶቤቺሃት።

27 እስ ህካን አቶተ ሀሶኢሁ አኤ ሀሰሰኖሰቤቺሃት፤ መሰንትስ አይሁደ እህቡ መኑ አይሁድ መኒሃ መገኑ ኣሴ አያን በረከተ ቤቀማኑተ እኮች አይሁደ እህቡ ዮሰርቹን አይሁደ ሀዕሉ ሀሰሰኖሰ።

28 ህካን እኮቤቺሃ ተ ሆጉተ ሹሎሚችለከ ጭምዬእ ብረ ኣሴንሳች ኤተሮን እስፔን ባዱ መራም ዋቃን ክዕኔተ ለዕይ ህጋም።

29 ህካን እኮቤቺሃ ክዕኔቤቹ አሜታም ወክት መሲህ በረከተ ዊምማን አፍ አሜታምገ ደጋም።

30 አመኤ ኦሶ! ኢን ሜጡበ እኬን ኢተኔሃ መገኑ ጠረኘገ ዱአ አቶኖተ ቀርቾሃ መሲህ ኢሲንለከ ጠሊለ አያን ኢታን ኡጫንክዕኔ።

31-32 መገኑ ዬ ኅሬ ሙንዲኖን ክዕኔቤቹ አሜች ክዕኔን ሜጡበ ፎሎጮተ አይሁድ ባዶን ዮ አመዕንበ መን አንጋች ፌሶኤተለከ ዬሩሳሌም ከተማን አኣም ሆጉተ አመዕናኑተ ሙንዲሰሳኢታ እኮተ መገኑ ኡጭዬ።

33 ወገሬት መገኑ ጉዕሚንከክዕኔ ሜጡበ እሁን፤ ኣሚዕን።

16

ጳውሎስ ወገሬት ሶሁስ

1 ፌቤን ክንክሪያ ከተማን ዮ አመዕናኖ ዱእ ሞናን ካደንታ አመዕነንቶ አመኔ ቤቱተ እሁሴ አን መሰከራም።

2 እሴን ልግብ መነላከ ኤሳሃ ሀዕልቶኢት እኮቤቺሃ ጠሊላኖተ ሀሰሰኛ ዋቁን እሴተ ቀርቶ ሱዕሚን ቶጌን ሀሲሰኛሴርቺን ጉዕሚንን ሀዕልዬሴ።

3 መሲህ ኢሰ ሆጎን ኢንን ሜጡበ አተ ጽርሰቅለለከ አቂለሁ «ወገሬቴ» ይዬሰ።

4 እሰ ኢተኔሃ ፎልሰ ህግሰ ኢቶእራን፤ ህካን እኮቤቺሃ አን ጠለዕለ እሁዕን አይሁደ እህበ መኒቶ መገኑ አመዕኔ መኑ ጉዕሙንኩ ገለትጭታሳት።

5 ህትን እሰ ሞኔን ጭምይታ አመዕናኑተ «ወገሬት» ይዬ፤

ህትን እሰይ ባዶን ወዕና መሲህ አመዕንቶለከ አኒሁ አበ ኢታንሰ ኤጴኔጦሴ «ወገሬቴ» ይዬሰ።

6 ክዕኔ በላን ጠረኝት አቶ መርየመ «ወገሬቴ» ይዬሴ።

7 ህትን አሳበ በላን ደገንቶአረለከ ኢቶን ዋዕን መሲህ አመዕንቶአረ ህትን ኢንን ሜጡበ ኡሱረንቶ እሉኤ አንድሮኒቆኔለከ ዩንያሴ * «ወገሬቴ» ይዬሰ።

8 ህትን ቀርቶ ኢሲን ኢታንሰ አንጽልያጦሴ «ወገሬቴ» ይዬሰ።

9 ህትን መሲህ ሆጎን ኒንን ሜጡበ አእኖ ኡርባኖሴለከ አን አበ ኢታንሰ እስጣቆሴሁ «ወገሬቴ» ይዬሰ።

10 ህትን መሲህ እሁሰ ፊተነሞ መስከረሞስ አጴሊሴ «ወገሬቴ» ይዬሰ፤ ህትን አርሰጦቡሎሴ ሞኒ መነ «ወገሬቴ» ይዬሰ።

11 ህትን እሉኤ ሄርድዮን «ወገሬቴ» ይዬሰ፤ ህትን ነርክሲሰ ሞኒ መኒቶ ቀርቶን አመዕንቶአረ «ወገሬቴ» ይዬሰ።

12 ህትን ቀርቶ ኢሲሃ አታ ካዲመተ ቱሩፋይናለከ ትርፎሴሁ «ወገሬቴ» ይዬሰ፤ ህትን ቀርቶ ኢሰ ሆጉተ ጠረኝት አታአረለከ መሲህ ኢታን አበ ኢታንሴ ጴርሲዴ «ወገሬቴ» ይዬሴ።

13 ህትን ቀርቶን መጠረሞ ሩፎሴሃ «ወገሬቴ» ይዬሰ፤ ኤሳሁ እለሴገ ኢትታኤ አማተሰ ወገሬት ይዬሰ።

14 ህትን እስክርጦሴሁ፥ ፍሌጎኔለከ ሄርሜሴሁ እሳንን ሜጡበ ዮ አመ ኦሶታ «ወገሬቴ» ይዬሰ።

15 ህትን ፊሎሎጎሴ፥ ዩልየሁ፥ ኔሮሴሁ፥ ኔሮሴ አመቤቱተ፥ ኦሎምፓሴ እሳንን ሜጡበ ዮ አመዕናኑተ ጉዕመንከ «ወገሬቴ» ይዬሰ።

16 ህትን ጡመ ሱንቃቀሚን ወገሬትጨቀሜ፤ መገን አመዕናኖ ጭምት ዱእ ሞናተ ጉዕሚንከ ወገሬት ሶኮህዕኔ።

16:3 ሶቀ. 18:2። * 16:7 ዩኒያሴ፡- የኖሁ መት-መቱ ሉህ ክታበት «የሊያ» ይታእ።

16:13 ማር. 15:21።

ጎፍሜ ሸዘነተ

17 እመኤ ኦሶ! አዕኑ ተማርቴንተ ትምርቴን ኦደንታእረለከ በላንከክዕኔ አደደመተለከ ጉፍቹ እሀኖርቹ ኤባ መኒቶ አገዕርቶኖተ ኡጫንክዕኔ፤ እሳቶ ሆኜ።

18 ህትኔ መኑ ገዉሰ ቤሉ ቀርቹኔ መሲህ ካደንትበራን፤ እሰን አመሰልት ጡመ ጠወአን ጎደበ ላፈ መን ቀልብ ሉሲሳኣ።

19 አዕኑ እንጂል ላጋተ አዘዘንቴንተረ እኬንተገ መኑ ጉዕሙንኩ ሞጮጮቤቹሃ ክዕኔተኔሃ አን አበ ሙንደዕዮም፤ ጠዉ እኮጎሬ ጡመ ጠዊሃ ሀይቻኑተለከ ሂለ ጠዊሃ ገዋኑተ እኮኖተ ሀሳም።

20 ቲሀ ወገሬት መገኑ ደዕል ሸይጣንቹ ሎካቶክዕኔ ዎሮን ደዕል ቀጠቀጠኖ፤

ቀርቹሃኔ ኢሰ ኣሰቱት ክዕኔን ሜጡበ እኩን።

21 ኢን ሜጡበ አኣኖ ጥማቶሰ ወገሬት ሶኮህዕኔ፤ ህትን እሉኤ እኮሀኑኡተ ሉቅዮሰለከ ኢያሶን ሶሲጸጥሮሰ ወገሬት ሶኮህዕኔ።

22 ህትን አን ከን ደብዳቤ ከተባንቹ ጤርጦሰ ቀርቾ ኢሰ ሱዕሚን «ወገሬት ዮንተንንደ?» ያንክዕኔ።

23 ኤሳለከ አመዕናኑተ ጉዕመንከ ኮህቹ ቶገኖ ጋይዮሰ ወገሬት ሶኮህዕኔ፤ ከተምሰ ብረ አፈኖ ኤርሰጦሰለከ አመኔቤቹ ቋርጦሰ ወገሬት ሶኮህዕኔ፤ [

24 ቀርቹሃኔ መሲህ ኢሰ ኣሰቱት ጉዕሚንከክዕኔ ሜጡበ እኩን፤ ኣሚዕን።]

ገለት ዱኦ

25 መሲህ ኢሰተኔሃ አን ዱዱብሳም እንጂል ሶህኖን መገኑ ክዕኔተነጠ እኮህዕኔተ አታለኖ፤ ኩ እንጂሉንኩ አበ ዘማኒሃ ማጠም ሄዕዮ ምሰጥር ለሊሰኖሃን።

26 ዘማኒሃ ጉዕሚ መገኑ አዘዡገን ምሰጥሩ ቲሱ ነብያኖ መጻፈ መሳን ለልዮኡ፤ ኩ ጉዕሙንኩ ኡመቱ እንጂል ደጎተለከ አመዕነት አደ አዘዘንት አሜቶታት።

27 ህካን እኮቤቹሃ እሰ ሜጥቹሰ መገኑለከ ሀይቹ እኮ መገኒሃ መሲህ ኢሰ መሳን ዘላለሚሃ ኬዕምኙ እሁንሰ፤ ኣሚዕን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d